

**Sosten unanime
pa ley cu ta
aumenta castigo
pa automobilista
irresponsabel**

Proyecto Mabon den su fase final:

Renobacion completo cu satisfaccion di su habitantenan



ORANJESTAD (AAN): E plan di restauracion di bari-onan, parti di vision mas amplio pa revitalisa comunidad residencial, ta sigui demostra resultado concreto, y Mabon ta bibo ehempel. E proyecto di rehabilitacion di e flatnan ta actualmente den su fase final, cu entrega previsto dentro di dos siman.



Robert Correa (ALBO), contratista responsable pa ehecucion di e trabaonan, a splica cu e proyecto a representa un reto considerable, mirando cu habitantenan a sigui biba den nan apartamento durante tur e proceso di renobacion.

“Renobacion den un edificio habita semper ta un reto,” Correa a expresa. “Tin hopi movicion, hopi buya, pero nos a traha cu respet pa cada persona su cas y nos a percura mantene bon comunicacion cu cada habitante.”

E trabaonan a inclui: (*) Cambio di bentana y porta. (*) Restauracion completo di fachada. (*) Pintura exterior cu un color nobo y mas moderno. (*) Reenforsa murayanan pa mas privacidad. (*) Mejoramento di parking, cada apartamento cu su espacio propio. (*) Instalacion di hekwerk y portanan pa mas seguridad. (*) Restauracion di trapi y structuranan di beton.

Segun Correa, un di e retonan di mas grandi tabata reemplasa parti di e estructura di beton y trapinan, pero e ekipo a logra completa esaki exitosamente.

“Nos ta contento cu e resultado final. E color nobo a duna e edificio un aspecto moderno, y lo principal ta cu e habitantenan ta satisfecho,” el a indica.

E coordinacion cu comunidad, describi como positivo. A pesar di algun inconveniente temporal, e ambiente general a keda di colaboracion y comprension.

Cu e proyecto casi completo, Mabon ta presenta un imagen renoba, simbolo di e esfuerzo continuo pa mehora infraestructura residencial y fortifica orguyo di e bario.

Noticia tristo pa e gran famia di ImSan

Director Drs. Joel Rajnherc di ImSan a fayece dialuna marduga

• Aruba a perde un gran visionario cu a crea e Centro Medico poderoso aki

Danki na curso di Fundacion Pa Nos Muchanan

Mas Centro di Cuido awor sa con pa actua den emergencia

ORANJESTAD (AAN): Hecho ta cu awendia, ta importante pa tur Centro di Cuido rond mundo ta ricibi training kico cada trahador tin di haci den caso di emergencia, y tambe den caso cu nan tin di duna prome auxilio na cualkier mucha.

Pesey mes, recientemente Fundacion Pa Nos Muchanan (FPNM) a organiza un trayecto di 4 dia di “Siguridad den bo Centro di Cuido”.

Motibonan principal ta cu asina, cada Centro di Cuido por ofrece tur hende siguridad y cumpli cu rekesitonan. Rond mundo tin paisnan unda nan ta rekeri pa cada Centro di Cuido tin por lo menos un trahador cu suficiente certificado pediatrico pa Prome Auxilio, y pa e ta presente constant na e centro.

Tambe ta asina cu personal di e Centro di Cuido mester sa y domina actuacion den cualkier incidente comun, manera muchanan cu haya dificultad pa hala rosea, quemadura, fractura, y esnan cu ta bay fo’i tino. Training ta yuda e trahadornan mantene nan mes calmo y actua eficiente durante situacionnan di extra stress aki.

Claro si nan ta siña con pa combati cualkier candela den cushina, ta un bonus agrega! Pesey Fundacion Pa Nos Muchanan kier a gradici Be Safe 4 Life Consultancy pa e tremendo trabao cu a yuda den e cursonan aki. Na final tur esnan cu a finaliza e curso cu exito, a ricibi un certifi-



cado.

Fundacion ta pidi pa tur Centronan keda pendiente pa e siguiente cursonan. Paso-bra tur hunto ta labora mihor pa siguridad di muchanan.



Celebrando 24 años de dedicación y responsabilidad:

Guarda nos Costa a celebra su aniversario cu orguyo y compromiso



ORANJESTAD (AAN): Diadomingo mainta, personal di Guarda Nos Costa a celebra nan 24 aniversario den presencia di Minister di Husticia mr. drs. Arthur Dowers.

Bayendo bek den historia, tabata dia 1 di Maart 2002 cu Guarda Nos Costa a keda inaugura cu e meta pa tene control riba cumplimiento di nos leyman di admision y expulsion. Actualmente Guarda Nos Costa ta conta cu 40 agente di GNC cu ta duna sosten valioso na KPA, DIMAS, Inmigracion y otro partnernan den e cadena hudicial.

Na comienzo di Guarda Nos Costa, Trudy Hassel y Chu Rincones tabata na cabes y a lidera e departamento aki pa varios aña. Actualmente David Leer ta carga e responsabilidad temporalmente den dobbel funcion, tanto na Inmigracion como na Guarda Nos Costa, cu e compromiso pa guia ambos departamento cu profesionalismo.

E trabao di Guarda Nos Costa ta di control riba personanan indocumenta, cumplimiento cu ley di admision, detencion di personanan no documenta, te cu nan expulsion for di nos Pais.

E mainta aki, e personal di GNC a disfruta di un desayuno completo na MooMba Beach Bar & Restaurant y a haya oportunidad pa bin hunto den un ambiente pafo di trabao.

Minister di Husticia Dowers na final a expresa su aprecio enorme pa e gran trabao cu cada un di e empleadonan di GNC ta haci diariamente, pero tambe a desea nan forza y determinacion pa sigui cu e bon trabao aki.

Guarda Nos Costa ta sigui comprometi cu seguridad, responsabilidad y estabilidad den nos comunidad. 24 aña despues di su fundacion, e departamento ta para firme, cu un mision cla y un compromiso continuo pa proteha Aruba y su frontera.



Noticia tristo pa e gran famia di ImSan

Director Drs. Joel Rajnherc di ImSan a fayece dialuna marduga

• *Aruba a perde un gran visionario cu a crea e Centro Medico poderoso aki*



ORANJESTAD (AAN): Siman a habri trempan cu e noticia tristo, ora cu tur empleado di ImSan na San Nicolas a wordo informa personalmente, cu nan Director stima, esta Drs. Joel Rajnherc a fayece marduga na Miami, Florida.

Algun tempo pasa, Drs. Rajnherc a wordo diagnostica cu un tipo di cancer, y el a busca yudansa pa combati esaki. Y e tabatin exito tambe! Su cancer a wordo eradica, pero loke a pasa den fin di siman ta cu el a haya un complicacion, y esaki a bin fuerte y a ocasiona su morto.

Drs. Joel R. Rajnherc a nace dia 6 di October 1949 na New York, y a studia e bunita profesion medico y a specializa su mes den Medico Pediatra. For di tempo cu el a cuminsa traha na Aruba, den un fraccion di tempo el a cuminsa haya cariño di mama di tur pashentnan, specialmente pa e forma sumamente cariñoso cu e ta atende baby y muchanan. Semper den Sala di Espera na su consultorio na Eagle, por tende mayornan ta papia y comenta ta con feliz nan ta cu nan yiu ta wordo atendi pa Drs. Rajnherc.

Drs. Rajnherc simplemente tabatin e filosofia pa duna tur pashent e atencion digno cu nan merece. Cu un yudansa cariñoso, ta stimula tur pashent pa recupera mas rapido. Y su pensamiento di e cuido medico y trato di pashentnan, no a djis keda den su pensamiento, sino el a radia esaki afo y algun hende a cuminsa tuma nota di esaki.

Di e forma aki, porta a habri pa el a bira y tuma puesto di Director di Instituto ImSan na San Nicolas. E tabata un reto cu Drs. Rajnherc a tuma



cu man habri, y el a probecha di esaki pa purba na uza tur ruta posibel pa Aruba ricibi un berdadero joya di clinica, cu a sigui expande, y ta avor e poderoso Centro Medico cu e ta avor. Y pa mantene pueblo bon informa, cu gusto e tabata complace DIARIO cu entrevistanan.

Hende di tur hende: Drs. Rajnherc tabatin e pensamiento, cu si bo empleadonan ta feliz y contento cu e trabao, cu nan trato pa tur pashent lo ta excelente tambe. Y na ImSan, ta tur empleado conoce nan director Drs. Rajnherc personalmente! Nan hasta conoce su casa Sandra, miho conoci como Sandy.

Algo cu hopi hende lo corda di dje, ta e forma cariñoso pa papia cu tur hende, y su pasenshi pa sinta scucha tur hende pa asina mesora trata na introduci cambio, drecha algo, of bay traha riba un plan.

Danki na su push constant, ImSan a logra haya aparatonan di radiologia cu a bira e prome na Aruba, y asina pashentnan no mester a bay Colombia of otro paisnan den region pa ricibi tratamento. Aki Aruba a spaar placa, y pashentnan por sigui haya tratamento cu lo ultimo den tecnologia, y cada dia nan

ta sigui pasa cu nan famia localmente mes. Hasta tabatin plan pa cuminsa acepta pashentnan di exterior pa bin tuma tratamiento aki.

Empuhe pa Ambulance: Director Drs. Rajnherc tabata mira constant e necesidad di training di personal di Ambulance cu ta cay bao di ImSan, como tambe e upgrade y renobacion di e unidadnan di Ambulance cu nan tin mester di dje.

Di e forma ey cada rato cu logra yega na e fondo necesario, hunto cu Gobierno y tambe AZV ta logra busca unidadnan di Ambulance. Momentonan di orguyo ora cu tin ceremonia di introduccion di e unidadnan nobo di Ambulance cu ta yega Aruba. Y ademas con ta splica cu pa casualidad a haya via di Corsou un contact cu otro compania pa por a bay cumpra unidadnan di Ambulance mas grandi.

Acreditacion JCI: Algo cu e Director Drs. Rajnherc tabata hopi orguyoso di dje, ta e hecho cu ImSan a logra haya na 2023 e seyo di 'Control di Calidad', y totalmente acredita pa e prestigioso entidad internacional di Joint Commission International (JCI).

Director di ImSan, Drs.

Joel Rajnherc a indica cu e tempo ey, cu e etapa cu nan a logra aki, ta un testament di e trabao duro di tur hende, incuyendo e dedicacion, e espiro di colabora, cu ta sigui pusha nan bay dilanti. Hunto tur hende na ImSan a logra sobrepasa retonan, a celebra exitonan, y continuamente a sigui enbusca di excelencia den e trabao. Danki na e esfuerzonan combina aki cu e dedicacion enfoca, cu nan por ta orguyoso di loke a wordo logra. DIARIO tabata presente e tempo ey, ora cu e Director di ImSan a gradici e empleadonan pa nan pasion, nan ideanan innovativo, y sosten continuo. E acreditacion di JCI, ta danki na e team cu tin na ImSan. Y e ta sigur cu nan lo sigui logra mucho mas etapa y exito nan dilanti.

Trato na empleadonan: Di hopi tempo por a tende con grandi e aprecio di empleadonan di ImSan ta pa cu nan director Drs. Rajnherc. E ta un profesional kende semper ta exige e mihor prestacion di cada uno di nan, pero pa nan keda mantene e toke humano. Tur esnan trahando na ImSan tabata entusiasmo cada biaha cu e visionnan cu Drs. Rajnherc tin pa keda expande ImSan cu servicionan cu ta yuda

comunidad grandemente sin cu tin bay busca asistencia medico den exterior.

Dos aña pasa ora cu ImSan a celebra su di 19 aniversario, pa celebra 'Dia di ImSan', a organiza un evento pa tur empleado, den forma di un 'Scavenger Hunt' cu a pasa door di cayanen di San Nicolas. E dia ey, Director Drs. Joel Rajnherc a indica cu e ta hopi orguyoso di henter staf y personal, pasobra "nan ta ofreciendo bon servicio na henter pueblo".

Esey ta e motibo tambe cu a mira un tipo leve di exodus di empleadonan di Hospital cu a bandona nan empleo anterior, y a bay traha na ImSan. Hopi plannan cu a ser presenta riba mesa, a cristaliza y comberti den realidad. Salanan di operacion cu lo ultimo den tecnologia. E servicio di Docternan di Wowo tabata conta cu e aparatonan di mas moderno, unda e especialista ta setup cada uno uzando sea computer of un tablet.

Sigur multitud di empleado, ex-colega, oficialnan di diferente instancia, pashentnan lo ta tristo cu e informe di su morto. Palabra di condolencia na su casa Sandy, su yiu muhe Sam kende tambe ta siguiendo estudio medico, y su yiu homber Riven.



Awo cu 2 florin mas, bo por gana e **MEGA PLUS**
***Afl. 380.000,-**
***Afl. 280.000,- + Afl. 100.000,-**
extra



HUNGA AWO



Benta ta sera 7:30 pm y sorteo ta hunga 7:45 pm

Diadomingo tabata Dia Mundial di Yerba di Lama:

Trahando keto bay pa proteha un herencia marino esencial pa e isla

ORANJESTAD (AAN): Dia-domingo dia 1 di Maart a observa Dia Mundial di Yerba di Lama (World Seagrass Day). Esaki ta un dia dedica na reconoce un di e ecosistemanan mas productivo y vital riba nos planeta. Na Aruba e 'veldnan' di yerba di lama tin un rol importante den e salud di nos costanan, nos beachnan, biodiversidad marino y e progreso di nos economia.

Directie Natuur en Milieu (DNM) tin como meta informa tocante e importancia di e dianan observa pa Nacionnan Uni. Dia mundial di Yerba di Lama, proclama pa Asamblea General di Nacionnan Uni na 2022, tin como obhetivo eleva conscientisacion riba e importancia di e 'veldnan' di yerba di lama.

Hopi biaha ta ignora yerba di lama den comparacion cu e rifnan di coral, pero yerba di lama ta un di e ecosistemanan mas productivo y valioso na mundo. Hopi biaha ta confundie cu alga, pero yerba di lama ta masha special pasobra nan ta e unico mata den lama

cu tin raiz, stam y flor. Nan ta forma sabananan extenso bou di awa cu ta funciona como e pulmonnan di nos oceano. Mester corda tambe cu tin diferente sorto di yerba di lama cu ta protegi pa nos leynan local.

Di con Yerba di Lama ta importante pa Aruba: Yerba di lama no ta djis "yerba den awa"; nan ta matanan cu ta crece y biba den tiki profundidad. Nan funcion ta fundamental pa Aruba su economia y ecologia manera:

Refugio pa biodiversidad! E 'veldnan' aki ta sirbi como luga di crecimiento pa hopi di nos pisca, cabay di lama y tortuga di lama manera e Tortuga Blanco. Sin e yerba aki, e cantidad di e especie nan lo bira menos.

Filtro natural: Yerba di lama ta purifica nos awa door di filtra sedimento y polutante. Esaki ta mantene nos lama cristalino, pa asina e keda saludabel y atractivo pa bishitante di lama.

Cambio di clima y 'Blue Carbon': Aunke nan ta cubri

solamente 0.1% di e fondo di lama globalmente, nan ta warda te cu 18% di e carbono oceanico di mundo. Pa Aruba, esaki ta nos miho defensa natural contra e impactonan di cambio di clima.

Proteccion di costa: E matanan aki ta reduci e forza di e olanan, funcionando como e prome liña di defensa contra erosion di nos santo blanco y inundacion durante mal tempo.

Un recurso den peligro: Lamentablemente, na nivel mundial, nos ta perdiendo 7% di e habitatnan aki tur aña. Na Aruba, e presionnan principal ta bin di: (*) Desaroyo acelerado na costanan. (*) Polucion y "run-off" di tera pa lama (ora awa yobe y lastra tera den lama). (*) Actividadnan di boto y hancramento di boto cu ta ranca e yerba for di fondo. (*) 'Dredging' (cobamento den lama pa saca santo) y cambio di clima.

Accion y Conservacion: Departamento di DNM ta enfatisa cu proteccion di yerba di lama ta directamente mara na



e Metanan di Desaroyo Sostenibel (SDGs) di Nacionnan Uni. Ora nos proteha nos yerba di lama, nos ta proteha nos seguridad alimenticio, calidad di awa y economia blauw.

Yerba di lama na Aruba ta enfrente menasa serio asocia cu comportacion y actividad

humano na nos costanan. P'esey tambe e yamada na comunidad y siguiente generacion, pa sea mas atento riba e balor di yerba di lama. Laga nos stop di mira yerba di lama como un "molester" na beach, y cuminsa mir'e como e proteccion di nos costa.

Esaki ta ultimo siman pa inscribi pa Poeta di Patria 2026

ORANJESTAD (AAN): E aña aki un biaha mas Comision Celebracion Dianan Nacional (CCDN), hunto cu Comision di Arte di Palabra, cu ta consisti di Departamentu di Cultura Aruba (DCA) y Fundacion Corector di Papiamento (FCP), ta organisa e prestigioso competencia pa nombra nos Poeta di Patria pa aña 2026. E aña aki ta uno special mirando cu nos ta celebrando 50 aña di nos Himno y Bandera y 40 aña di nos Status Aparte.

Pa e motibo aki nos ta extendiendo un invitacion na tur escritor, poeta y declamador di aña y mas, pa busca den nan curason e inspiracion pa skirbi bo miho elogio y poema na Papiamento, di nos dushi tera Aruba y su cultura. Boso participacion ta un aporte

grandi na e celebracion di nos Himno y Bandera 2026 y amor pa nos patria.

E ultimo dia pa inscribi pa participa y pa entrega bo obra ta dia 6 di maart 2026.

E competencia di Poeta di Patria lo tuma luga dia 14 di Maart 2026 na Nicolaas Store na San Nicolas pa 7 or pm.

Escritornan cu inscribi lo mester bin presenta nan obra. Den caso cu e persona mes no por presenta su obra, por laga un otro persona present'e, esaki na nomber di e autor. Cada escritor por entrega un



(1) obra, e poema mester ta na Papiamento y por tin entre 4 cu 5 strofa; cada strofa mester tin 4 liña y por rima.

Pa inscribi digitalmente, bay na e website aki: www.bit.ly/patria2026

Pa inscribi pa e competencia di Poeta di Patria 2026 por manda tambe un email na artedipalabra@gmail.com, of por yama pa mas informacion na 582-2185.



TRABOU DI MANTENCION RIBA LIÑA DI DISTRIBUCION PARADERA

Interupcion di Coriente Planea

En conexon cu trabounan necesario pa mantene un suministro di coriente confiabel, e servicio di coriente lo wordo interumpi:

Diahuebs, 5 di maart 2026
8:30 AM te cu 4:00 PM

Den vecindario di:

- Babijn (un parti)
- Bloemond (un parti)
- Cristal (un parti)
- Koeriboeri (un parti)
- Marawiel
- Matividiri (un parti)
- Paradera (un parti)
- Roncado (un parti)
- Rooi Prikichi (un parti)

N.V. ELMAR ta pidi disculpa pa e inconveniencia cu e interupcion di coriente aki por causa.

Bishita www.elmar.aw pa mira e lista di adresnan afecta.

Danki pa e comprension.



Parlamentario John Hart:

Sosten unanime pa ley cu ta aumenta castigo pa automobilista irresponsabel

Algo cu no mester a tarda tanto pa concretisa

ORANJESTAD (AAN) – Den su calidad como Parlamentario di AVP y Presidente di e Comision di Husticia, John Hart a enfatisa importancia di fortifica nos cuadro legal, den hopi aspecto, incluyendo siguridad di trafico. E siman aki, na momento cu, unanimamente a aproba e ley cu ta aumenta castigo pa casonan di ‘hit & run’, e parlamentario a comparti un enfoque critico pero constructivo riba e proceso legislativo y e responsabilidad comparti di Parlamento pa haci mas y miho.

“Ora nos ta papia di siguridad di trafico, no ta solamente cuestion di tin leynan riba papel. Un parti fundamental ta comportacion di automobilistanan,” Hart a expresa. Segun e parlamenta-



rio, den nos sociedad ainda tin un cultura unda e consumo di uno, dos, tres of mas cerbes no ta mira como obstaculo pa bay tras di stuur. “Nos mester evalua si nos legislacion ta cubri e realidad aki di forma suficiente y efectivo,” el a agrega. Ademas di esaki, Hart a señala e preocupacion riba vehiculonan right-hand drive, cu pa motibo di infraestructura local por presenta limitacion di bista y angulo, creando situacionnan potencialmente peligroso riba

caminda. “Infraestructura di nos pais no a wordo diseña pa e tipo di vehiculo aki. Esaki mester forma parti di nos analisis integral riba siguridad vial.”

Otro punto crucial ta handhaving. Refiriendo na e comentario di Raad van Advies, Hart a cuestiona cuan efectivo un aumento di castigo por ta si no tin e capacidad suficiente pa controla y impone esaki. “Si nos ta aumenta castigo sin fortalece control y capacidad di imposicion, nos mester pregunta nos mes kico lo ta e impacto real cu esaki lo tin,” el a indica. El a reconoce cu capacidad di cuerpo policial ta un factor importante, pero tambe a enfatisa cu tin otro instrumentonan y mecanismonan cu Parlamento por explora pa

yuda fortalece su cumplimiento. Tocante e aumento alarmante di caso di hit & run, Hart a recorda cu e iniciativa legislativo cu a trata y aproba e siman aki ta data for di 2019. “Hit & run no ta un problema di awe. Ta un fenomeno cu a bin crece aña tras aña. E pregunta legitimo ta: dicon e ley aki a tarda casi ocho aña prome cu a aproba?”

Hart a señala cu e reflexion aki no ta pa apunta dede, pero pa saca cierto enseñansa institucional. “Nos como Parlamento mester ta autocritico. Kico nos por a haci diferente? Con nos por evita cu leynan importante ta keda den lachi? Legislacion mester responde na e realidad di nos comunidad na momento oportuno, no despues cu problema a escala.”

Como Presidente di e Comision

di Husticia, Hart a enfatisa cu e proceso di e ley aki a muestra algo positivo: Parlamento ta capaz di traha crusando e liña partidario ora bienestar general ta na prome luga. “Siguridad di nos comunidad no tin color politico. Ora tin iniciativa cu ta sirbi interes general, nos ta yega na consenso y traha hunto. Nos kier tambe felicita tur esunnan cu a impulsa y sostene e iniciativa aki for di 2019 te su aprobacion.”

Finalmente, Hart a reitera cu e compromiso di Parlamento ta pa sigui fortalece su funcion legislativo, cu mas rapidéz, mas efectividad y siempre cu e bienestar di comunidad como guia central. “Nos ta traha pa un Aruba mas sigur. Y esaki ta un responsabilidad comparti, tanto di ciudadano como di legislador.”

LUNA DI LOCURA!

CUMpra 2 LOTTO 5 Y HAYA 1 LOTTO 5 LOCO GRATIS

CON PA HUNGA?

CU CADA COMPRA DI 2 LOTTO 5 RIBA E MESUN TICKET TA RICIBI 1 LOTTO 5 LOCO COMPLETAMENTE GRATIS. MAS BO CUMpra, MAS TICKET LOCO GRATIS BO LO RICIBI!

PROMOCION TA VALIDO DESDE 1 DI MAART TE CU 31 DI MAART

www.lottoaruba.com

Facebook, Twitter, YouTube, Instagram icons

lotto Cambiando bida.

Area di Westpunt

Eva tin un cas fenomenal na benta na Tibushi



ORANJESTAD (AAN): Den un entrevista cu Eva Wever, kende ta ofrece servicio fenomenal pa yuda vende, cumpra y inverti den propiedad, el a muestra cu e tin un coleccion unico di propiedad na benta.

Eva di Bold Properties, tin na benta casnan di famia y tambe edificionan ideal pa inverti cu nan.

Tibushi 36 na Westpunt, e tin un cas di 173 meter cuadra, riba un tereno di 451 meter cuadra. E cas ta wordo bendi completamente muebla, y tin papeleo up-to-date pa cu e cas.

E cas aki tin 21 panel solar riba dje, tin un cura completamente cera rond di dje, hasta un

Mas patras e tin un washok cu closet, full aire acondiciona tambe. Ademas e persona cu cumpra e cas aki, lo haya un auto 2016 Nissan Leaf electrico.

Riba e potret por mira e espacio amplio cu e cas aki na Tibushi ta ofrece.

Pa mas informacion por yam'e na 560-0029 of via email na: evewever@aol.com pa mas detaye y splicacion.

Mi nomber ta Eva Wever, y mi ta na bo servicio, pa yudabo Bende, Cumpra of Inverti den Propiedad.

Mi tin varios cliente local buscando cas of propiedad pa cumpra :
Ta busca den O'stad, Madiki, Dakota, Tanki leendert area cas te cu 500mil florin. Cliente tin pre-approval di banco.

Tambe cas of propiedad te cu 800 mil florin- den area di Bubali, Washington, Shaba.

Si abo of bo famia ta kila pa bende awor, please contact mi inmediatamente. Mester rapport?, mi por yudabo tambe. Mi ta warda riba bo yamada pa nos bende bo propiedad.

From family homes to investments, contact me to view this exceptional selection currently on the market. Personalized, honest and friendly service guaranteed.

Join me @evaboldpropertiesaruba for perfect property pairings, and update

560-0029 evewever@aol.com
LinkedIn: Evelin Wever

BOLD PROPERTIES - ARUBA

A haya lote miyonario di marihuana na un cas

Trinta y 18 luna di prizon pa pareha involvi den bendemento di pakinan di marihuana

ORANJESTAD (AAN): E homber di inicial J.O.T. y e muhe V.V. a scucha Hues confirma e exigencia di Fiscal pa nan. Hues a hala nan atencion cu normal e castigo lo mester ta hopi mas halto. Nan a wordo haya culpabel cu entre 1 September 2025 y 23 September 2025, intencionalmente nan tabata vende, transporta of posesion di marihuana. Polis a haya 282 kilo di marihuana den e cas caminda V.V. tabata keda na Zeewijk.

Bendemento di Droga:

Hues djis na forma direct a puntra J. si e acusacion ta berdader y J. a admiti cu el a suministra marihuana. El a bisa cu 4 biaha el a transporta marihuana di un lugar pa otro. Tambe el a duna amigonan dos pa tres biaha marihuana. El a bisa Hues cu nunca el a haya pago pa e transporte di marihuana. El a bisa cu e homber Venezolano tabata yam'e y e tabata haya tas cu marihuana pa hiba na un lugar. Hues a puntr'e si e tabata bay busca y droga y si e tabata haya placa. J. a splica cu tur cos tabata depende unda J. tabata.

Tin biaha e Venezolano ta hiba e droga p'e. Ta trata aki di pakinan di 1 kilo di marihuana. El a bisa cu e tabata cumpra for di e Venezolano pa 8 aña. Segun J., e tabata huma hopi marihuana y e tabata haya marihuana como pago pa e transportenan cu e tabata haci. Hues a puntra J. cuanto droga el a haya. J. ta calcula cu el a haya 200 pa 300 gram cu segun J. ta mas o menos 300 pa 400 Florin. Hues a puntr'e si e tabata vende cu amigonan.

Acusado J. a splica Hues cu amigonan tabata pidi'e pa droga y e tabata contacta e Venezolano y e Venezolano tabata trece e droga p'e y e tabata hiba e droga pa e amigonan. El a splica cu hopi biaha tabata 10 gram cu ta 80 Florin. Hues a remarca cu e 300 gram cu J. tabata haya ta 2400 Florin y no mas o menos 300 pa 400 Florin. Hues a remarca cu si J. tabata tuma



cen di amigo y bay cumpra for di e Venezolano, esey ta wordo considera como un bendedor. Segun J., e no tabata vende.

Total 282 kilo di marihuana confisca: Acusado J. a bisa Hues cu el a acerca e muhe V., cu tabata un colega di trabao na un hotel, pa warda e lote di marihuana. Segun J. via V. el a papia cu e Jamaquino pa e Jamaquino y e Venezolano papia y yega na un palabracion pa warda e lote di droga. V. a declara cu ta e Jamaquino a pidi'e pa warda e droga. Segun V. e conoce e Jamaquino pa basta tempo. El a bisa Hues cu el a haya un yamada di un Venezolano pero e no conoce.

El a bisa Hues cu el a bisa e Venezolano pa papia cu e Jamaquino y despues e Jamaquino a pidi V. pa warda droga p'e. Segun V., e lo a haya 5 mil Florin pa warda e droga. Ariba pregunta di Hues, el a bisa cu e no tabata sa cuanto droga el a haya pa warda. Hues a remarca cu Polis a confisca 282 kilo di marihuana na e cas di V. Segun V., e no a haya pago. El a splica Hues cu e Jamaquino tabata yam'e y bis'e cu tin hende ta bay busca droga. E persona tabata WhatsApp V. y V. tabata hiba e paki di droga na e persona y e persona ta paga. Despues e Jamaquino tabata busca e placa cerca V.

Hues a mostra cu Polis a haya un schrift cu anotacionan di droganan cu tabata wordo busca y cuanto droga y cuanto placa. V. a bisa Hues cu el a hacie door di necesi-

dad di placa pa paga school pa su yiunan. Hues a bisa cu e total di droga ta mas o menos 1 miyon Florin. Ta calcula cu original tabatin 350 kilo di marihuana y un parti ya a wordo entrega caba. Ta asina cu J. tambe a bay 6 biaha busca paki di droga for di V. Hues a bisa cu tin 4 hende ta bisa cu a cumpra for di J. Segun J. e no tabata vende. E tabata yuda nan haya e droga.

Fiscal: E momento ey, Fiscal a bisa Hues cu dia 21 September 2025, Polis a detene J. cu tabatin marihuana den su poder. Den J. su smartphone a mira potretnan di bultonan di marihuana. A haya chat den J. su smartphone cu e muhe V. Investigacion a muestra cu e droga tabata warda na un cas na Zeewijk unda V. tabata keda. Despues a bay na e cas unda V. a keda. A haya 506 paki di droga y tambe un schrift di administracion cu V. tabatin. Fiscal a bisa cu en total mas di 285 kilo di marihuana a keda confisca. Tanto J. como V. a admiti. V. su funcion tabata pa warda e droga y tene administracion di e droga y placa. J. tabata transporta droga pa hende. Na opinion di Fiscal, en total ta 6 biaha J. a bay busca droga for di V. y hiba pa otro. En total 139 paki di droga J. a bay entrega.

Fiscal ta haya cu nan ta complice di posesion, transporte y vende droga. El a sigui bisa cu cada un tabatin un funcion den e asunto aki. Fiscal a mostra cu e usamento di marihuana ta causa adictonan di droga cu ta crea criminali-

dad y miseria den famia.

Fiscal a exige a base di maneho di Hulanda, pa V. 30 luna di prizon y pa J. 18 luna di prizon. Fiscal a bisa cu e placa cu a keda confisca na cas unda V. tabata keda y e schrift mester keda confisca. Pa loke ta J., e placa, e smartphone y tas cu droga ta keda confisca.

Abogado: Aki abogado mr. Canwood a bisa Hues cu J. a admiti tur cos y no tabata haya pago sino un tiki marihuana pa su mesun uso. E abogado a mostra cu ta promer biaha cu J. ta cay cera y su funcion den e caso aki tabata transporta e droga y a laga e Venezolano y Jamaquino papia. E abogado ta haya cu J. y V. a wordo usa pa e Venezolano y Jamaquino. E abogado a bisa cu e placanan cu a haya di J., ta placanan di tips cu e tabata haya di su trabao na hotel. El a pidi Hues pa J. por haya e placa. Abogado ta haya e castigo exige pa Fiscal ta na su lugar.

Abogado mr. Kuster a bisa Hues cu V. a admiti tur cos. E tambe no tabata vende sino a wordo usa pa warda e droga y haci administracion. Na

opinion di mr. Kuster, J. y V. a wordo usa pa hendenan cu ta experencia pa esaki. El a bisa cu V. a wordo priminti 5 mil Florin pero V. no a haya esaki. E abogado a bisa Hues cu e placa cu Polis a confisca ta placa cu V. a gana como waiter y el a pidi Hues pa V. haya e placa bek y ta laga e decision di castigo den man di Hues. **Sentencia:** Hues a sera tratamiento di e caso y a pospone e caso pa bay analisa y pensa. Despues di un rato Hues a bolbe y a dicta sentencia di biaha. Hues ta haya legalmente proba cu J. y V. ta complice di vende, transporta y posesion di marihuana. Hues a bisa cu e comportacion aki, J. y V. a mantene e circulacion di marihuana. Hues a bisa cu e ta tene cuenta cu maneho di Corte.

El a mostra cu segun maneho, pa un mula di 25 Kilo di marihuana ta 21 luna di prizon. Sinembargo, Hues a confirma e exigencia di Fiscal pa J. y V. Hues a hala nan atencion cu en realidad e castigo mester ta hopi mas severo. Pa loke ta e placa, smartphone y schrift, Hues a bisa cu nan lo keda confisca.

DANKI MAESTRO



Mi ta sintimi hopi Contentu i gradisi cu MAESTRO BENJAMIN, mi tabata sufri di artritis doló di wesu, rudia, man i pa colmo mi no tabata por a drumi bon di tantu doló cu mi tabatin,

mi tabata sufriendo, mi tabata bebe hopi remedi pero e dokternan no por a yudami. 2 aña pasa mi a tende di MAESTRO BENJAMIN na radio, mi a disidi di yamé paso ta un señora cu hopi eksperensha, ela bisami tur cos via telefon i despues ma bai wak personalmente anto ela curami den 4 luna e no tabata fasil pero e tabata manera un milager di Dios. Awendia mi ta ripará cu hopi malesanan dokternan no por cura i mi ke bisa tur hende na ARUBA, si bosnan tin un malesa cu no por cura, yama MAESTRO BENJAMIN ami a wordu curá bo mester tin solamente fe i pasenshi. Dios bendishoná e MAESTRO BENJAMIN

CEL/ 641-4186

Lider di Sindicato TOPA:

Den KIA mester alomenos 22 personal extra pa traha overtime den e diferente warda

**Pa draai e dienst no tin suficiente Bewaarder ni Beveiliging*

ORANJESTAD (AAN)-- Lider di Sindicato TOPA, señor Edsel Figaroa, den entrevista cu Matutino DIARIO, a splica cu el a wordo acerca diferente bi-aha, y no di awo, pero pa añanan caba, door di e trahadornan di KIA, tocante e situacion cu tin eyan, cu no tin suficiente personal pa draai e dienst.

“Por ehemplo, actualmente, kieren aworaki, pa nan draai e warda di 7’or di mainta pa 3’or di atardi, mester di alomenos

10 persona extra cu mester busca pa traha overtime, si no e dienst no por draai normal”, Figaroa a señala. El a agrega cu mescos ta sosode pa e warda di 3’or pa 11’or unda mester di cinco pa seis persona pa traha overtime. E siguiente warda cu ta di 11’or pa 7’or atrobe mes cinco pa seis persona pa traha overtime. Kieren, cu pa e Instituto draai bon, mester di alomenos 22 persona extra pa dia, pa traha overtime. “E trahadornan aki no ta



haya chens di descansa. Nan ta bin traha, tin di nan cu ta traha 16 ora, bay cas sosega, bolbe bin traha. E consecuencia di esey ta cu e trahado ta bira irita, e ta haya mal beis, e ta bira

malo pasobra su energia ta baha, y nan ta meld AO. Consecuencia di esey ta bin tende cu nan ta mal trahado, cu no ta coopera pasobra ta bira malo. Pero e stress di trabao ta duna bo e situacion eyan”, Edsel Figaroa, presidente di TOPA, a señala. El a sigui bisa cu p’e bay mas leu riba dje, na cierto momento no tin espacio pa e trahado tuma vakantie. “Bo no por tuma vakantie, bo no por descansa, esnan cu ta deteni tambe ta mire riba e traha-

do cu ta irita lihe, e ta fada, bo ta purba simile tur dia, pero bo ta trahando den un situacion asina pa hopi ora, cansa, e smile no ta sali riba bo cara, ni cu bo oblig’e”, Figaroa a subraya. Señor Figaroa a señala cu actualmente tin 31 bewaarder ta trahando den Beveiliging, y pa traha optimalmente mester di alomenos 115 bewaarder y 68 beveiliging. “Kieren, manera oir ta mira tin un short basta grandi”, Lider di sindicato TOPA a señala.

Angela Ras, director di CEDEHM:

“#Give to Gain” ta e slogan pa Dia Internacional di Hende Muher dia 8 di Maart

**CEDEHM lo enfoca riba e slogan aki “Duna pa gana”*

ORANJESTAD (AAN)-- Den entrevista cu Matutino DIARIO, señora Angela Ras, Director di CEDEHM (Centro di Desaroyo di Hende Muher), a elabora riba e slogan di “Dia Internacional di Hende Muher 2026”, cu ta wordo conmemora e proximo Diadomingo 8 di Maart.

Pa e fecha aki e slogan mundial pa e dia aki ta “# Give to Gain”. Señora Ras a elabora tocante e esencia di “Give to



Gain”.

Give ta pa stimula e comunidad pa duna y pa esaki CEDEHM a uni cu Cruz Cora y hunto nan ta bay haci un colecta.

“Pero lo ta pa mi duna algo, pa mi haya algo. E algo cu nos ta haya ta un comunidad mas ekitativo. Anto, p’esey CEDEHM a scoge e doe mee e slogan aki, pa motibo cu nos ta bay enfoca riba nos hendenan muher dunando esnan mas vulnerable nos ta haya hopi, no na material pero un comunidad miho pa nos, miho pa nos yiu-nan, miho pa nos tur”, Angela Ras a expresa.

El a subraya cu hende muher t’ey henter aña y ta hopi interesante cu nan mes den CEDEHM tin diferente generacion, y ta

hopi interesante con nan ta wak cosnan y con e mes ta wak cosnan.

Angela Ras a splica cu te cu nan haci 18 aña ta hende muher, pero prome cu esey nan ta mucha muher, y esnan cu ta mire di otro manera, no ta determina ken nan ta.

“Nan ta mucha muher te ora nan haci 18 aña. Ora nan ta haci 18 aña nan ta hende muher. CEDEHM

semper ta boga pa bo respeteta hende muher y un di nos metanan ta pa concientiza pueblo pa respeteta hende muher”, el a reitera. Pa durante 2026 nan ta sigui cu e proyectonan cu CEDEHM a bin ta elaborando tur e añanan aki, manera grupo di combersacion, nos miho version, y traha hunto cu otro instancianan.



AANKONDIGING EJ.nr.AUA202502062

Bij exploit van mij, Vanessa Hodgson, deurwaarder bij het Gemeenschappelijk Hof van Justitie van Aruba, Curaçao en Sint Maarten, en van Bonaire, Saba en Sint Eustatius, alsmede bij het Gerecht in Eerste Aanleg van Aruba, d.d. 2 maart 2026, waarvan een afschrift is achtergelaten bij de directeur van de DWJZ op Aruba, die het origineel voor gezien heeft getekend, is aan: OLGA LIDIA DIRKS, wonende te Nederland, zonder bekende woon- en/of verblijfplaats, BETEKEND: een grosse van een beschikking van 2 februari 2026, op verzoek van Lorenzo Sepulveda Martinez, wonende op Aruba, waarbij de echtscheiding tussen partijen, op 16 juni 2016 in Aruba met elkaar gehuwd, is uitgesproken.

De deurwaarder voornoemd,

TA SOLICITA PA TRABOU

Part-Time Cashier

Aplica Personalmente Na
Seroe Blanco
Service Station
DeLasallestraat 89



Parlamentario Jennifer Arends-Reyes:

Lo ta bon pa explora posibilidad di app pa registra presencia di mucha na centro di cuida

ORANJESTAD (AAN): Parlamentario Jennifer Arends-Reyes ta propone e introduccion di un sistema digital moderno pa registra presencia di muchanan na centro di cuida. E proposicion aki tin como meta fortalece supervision, seguridad y comunicacion entre centro di cuida y mayor.

Segun Arends-Reyes, e sistema actual, den hopi caso, ainda ta depende riba lista di papel y registro manual. "Den un tempo unda tecnologia ta avanza asina rapido, nos mester move cu e

temponan. Un app digital pa presencia lo duna mas transparencia, eficiencia y seguridad pa nos muchanan," Sra Arends-Reyes a declara.

E app lo permiti: (*) Registro directo ora un mucha yega y ora e bay cas. (*) Notificacion automatico pa mayor via mensahe of 'push-notification'. (*) Un sistema sigur cu ta warda informacion di forma confidencial. (*) Un panorama cla di presencia pa directiva y autoridad competente.

Arends-Reyes a enfatisa cu seguridad di mucha mester ta prioridad number un. "Mayor



tin derecho di sa cu nan yiu ta bon y cu nan a yega centro di cuida sin problema. Cu un sistema digital, nos por purba evita confusion, error

humano y situacionnan innecesario."

Ademas, e parlamentario a indica cu e propuesta ta alinea cu e vision di modernisacion di sector social y educativo na Aruba. Digitalisacion no solamente ta mehora proceso administrativo, pero tambe ta contribui na un cultura di responsabilidad y transparencia.

E iniciativa lo por sali di sector priva of wak kico tin disponibel caba style di "Procare Childcare" app lo por consulta cu Ministerio di Enseñansa asina cu directiva di diferente centro di cuida,

pa evalua factibilidad, costo y proteccion di dato personal conforme legislacion vigente.

"Nos mester inverti den solucionnan inteligente cu ta pone bienestar di nos muchanan prome. Si nos por uza tecnologia pa facilita bida di mayor y personal di cuida, nos mester haci esey," Arends-Reyes a conclui. Cu e propuesta aki, Parlamentario Jennifer Arends-Reyes ta reafirma su compromiso cu innovacion, proteccion di mucha y fortalecimiento di calidad di cuidonnan na Aruba.

Diabierna 6 di maart,

Bold ta presenta su di 3 'Annual special Women's Seminar'

Bold Properties Empoderando Hende muhe!



ORANJESTAD (AAN): Riba 6 di maart, Bold lo presenta su di 3rd annual special seminar, en conexion cu International Women's Day y nan fecha di inauguracion!

E iniciativa aki nace for di un vision cla: crea un movimiento di sosten, inspiracion y crecimiento entre muhenan na Aruba. Bold tin 13 hende muhe cu ta traha hunto pa logra nan metanan profesional y personal. Fundamental na Bold; ora un muhe yuda otro muhe crece, tur dos ta

gana.

Segun representantenan di Bold, un di e camindanan mas poderoso pa yega na nan meta ta precisamente ora nan dici di yuda otro.

Motibo pa amplia e impacto y invita mas hende muhenan di nos comunidad pa forma parti di un experiencia cu lo inspira y fortalece.

E evento lo enfoca riba temanan relevante cu ta motiva, reflexiona, y yuda reconoce bo potencial y para firme den bo propio capacidad. Lo crea un

espacio unda hende muhenan por comparti ideanan, gana confianza y siña di experiencia di otro, cu interaccion y construi relacionnan positivo basa riba bon energia y respet mutuo. E intencion ta cla: educa, sostiene y empodera cada hende muhe. Aruba ta bendiciona cu hopi muhe cu a tuma posiconnan importante y cu ta haci un diferencia real den negoshi, liderato y den nos sociedad. Y ora hende muhe traha hunto, e impacto ta aun mas grandi.

Edsel Figaroa, lider di sindicato TOPPA:

Trahadornan di KIA a informa TOPPA cu nan kier bay den accion

ORANJESTAD (AAN)-- Edsel Figaroa, Presidente di Sindicato TOPPA, den entrevista cu Matutino DIARIO a menciona cu el a y ta bisa tur gobierno, cu nan mester zorg pa trece suficiente hende pa traha den KIA, como Bewaarder y Beveiliging. El a subraya cu e ta conta pa Cuerpo di Polis, Brandweer, Douane, etc., pero e situacion alarmante aworaki ta na KIA.

"Mas ainda, aki cinco aña tin alomenos diesdos Bewaarder cu lo bay cu pensioen; kieren, 19 lo keda. Mester bin un solucion urgentemente", Figaroa a señala.

El a relata cu siman pasa, segun e tin entendi, e Minister a bishita KIA y e trahadornan tabata hopi positivo pensando cu nan lo a bay haya bon noticia pa nan, pero a resulta cu nan no a haya nada positivo.

"Es mas, despues di e bishita, mi a haya hopi yamada pa bisa mi cu nan kier papia cu TOPPA, pasobra nan ta bay subi caya. P'esey mes mi a bisa nan 'no, warda mi un rato, pa haci e entrevista, y despues di esey nos ta sigui papia. Ami ta pendiente durante e dia aki pa mi tuma contacto cu nan. Ami ta traha a base di peticion di miembronan, no a base di accion, etc., mi trabao ta pa purba



evita accion y yega na solucion. Pero ora bo no ta yega na dje, bo tin cu bay mas leu", e lider sindical a declara.

El a menciona cu TOPPA a manda varios carta pa Minister. Mas of menos un cinco pa seis luna atras, nan a haya un reunion cu e Minister, unda nan kier a atende cuater diferente situacion di diferente departamento, y el a bisa cu e ta duna cada un mey ora, pero den 20 minuut pa mey ora el a atende tur cos den pura, pasobra e mester a bay atende algo otro. "El a laga nos sa cu e ta bay reuni cu nos pronto bek, cu e ta avisa nos, pero nada te awe. Nos a manda p'e diferente carta pero mi no kier bay den detaye. P'esey p'ami tin un situacion

urgente y e mester tuma medida riba dje", presidente di TOPPA, Edsel Figaroa a remarca.

Diasabra awor tin e prome 'Baki den Bario' pa 2026




ORANJESTAD (AAN): Aruba ta continua fortalece su compromiso cu limpieza y orden den bario, cu e anuncio di e prome edicion di "Baki den Bario" pa aña 2026, cu lo tuma luga diasabra 7 di maart den e bario di Tanki Leendert. Accion lo ta riba un tereno cu ta keda net patras di Scol Colegio Ora Ubao.

E iniciativa, cu a haya bon respuesta durante 2025, ta un esfuerso conhunto entre Ser-

limar, City Inspector, DOW, Compania Carenza y demas stakeholders, cu e meta di facilita comunidnan cu un forma practico, accesibel y organiza pa deposita sushi y desperdicio voluminoso.

Durante un conferencia di prensa riba Dialuna mainta, Prome Minister Mike Eman a haci e anuncio y a subraya cu "Baki den Bario" no ta solamente un actividad di limpieza, pero un instrumento



concreto pa acerca servicio publico mas cerca di e ciudadano.

Na caminda pa Baki permanente: Ademas di e edicion regular den bario, Gobierno a confirma cu tin plan pa pronto introduci un sitio piloto permanente, cu lo ta disponibel 24 ora pa dia, 7 dia pa siman. E sitio aki lo permiti deposito di diferente tipo di desperdicio, tanto residencial como comercial, sin

costo pa e usuario.

E meta ta pa habri e prome sitio permanente na final di maart of comienso di april. Cu esaki, gobierno kier reduci e necesidad pa transporta desperdicio pa otro area remoto y facilita un solucion mas structural pa maneho di sushi.

Segun stakeholders, e iniciativa ta basa riba colaboracion amplio. "Nos ta mira con Aruba por bin hunto pa man-

tene nos isla limpi. E apoyo di diferente entidadnan publico y priva ta fundamental pa logra e meta aki."

"Baki den Bario" lo sigui move pa diferente bario grandi riba e isla durante 2026, sigurando cu cada parti den comunidad tin oportunidad pa participa activamente den mantencion di un Aruba mas limpi y ordena.

Proyecto di renobacion Mabon a trece bida nobo den bario

Habitante cu 22 aña den e area ta gradici gobierno



a mira e transformacion di cerca ta señora Louisa Ann Brathwaite, pensionado cu ta biba den e apartamento pa 22 aña caba.

"Mi ta biba aki 22 aña e aña aki na november," señora Brathwaite a comparti cu orguyo. Durante e añanan, el a mira e bario pasa door diferente etapa. Segun Louisa Ann, e comunidad semper a keda fuerte, cu bisiñanan cu ta sostene otro y cu un sentido di union.

Riba e trabaonan actual, el a expresa su satisfaccion cu e mehoranan cu a tuma luga. "E construccion ta bon," el a indica, e cambio nan ta duna

un sentimento di renobacion agradabel den e area.

Pa señora Brathwaite, e iniciativa aki ta mas cu solamente drecha edificio; ta un señal cu e bario no a wordo lubida. El a expresa cu e atencion cu gobierno, muy particularmente Prome Minister Mike Eman, ta duna na e comunidad, ta importante pa e habitantenan, specialmente esnan cu a biba na Mabon pa hopi aña caba. E proyecto Mabon ta forma parti di un esfuerso mas amplio pa restaura y revitalisa diferente bario, reeforsando infraestructura y fortaleciendo cohesion social den comunidad.

Roderick Croes -Director:

Douane ta controla importacion di auto, DTI ta controla uzo di auto riba caminda

ORANJESTAD (AAN): Ora un auto no ta prohibi pa drenta Aruba, Departamento di Aduana Aruba, Douane ta lag'e drenta y no ta controla detayenan di kico ta permiti of kico no ta permiti segun regla di Dienst Technische Inspecties, DTI of segun regla di trafico, asina señor Roderick Croes, Director di Douane a duna di conoce den un entrevista reciente.

El a remarca cu tin un diferencia entre prohibicion pa drenta Aruba y e prohibicion pa wordo uza na Aruba. E ultimo aki, ta cay bou di DTI y no bou di Douane.

Señor Croes a enfatisa cu e tarea primordial di Douane ta pa manera cu e auto drenta, controla si tur documento ta na ordo segun e balor di e auto y si invoerrechten ta paga. Autonan cu wordo importa cu entre otro color di luz no ta cuadra cu regla di DTI, no tin prohibicion pa drenta Aruba. "E autonan aki no ta prohibi pa wordo importa y na momento cu nan wordo importa, Douane ta haci especificamente su tarea, cu ta pa percura cu e factura ta bon, douane waarde ta bon, tur gasto a wordo incorpora. Y na momento cu esaki ta cla, Douane no tin un trabou mas den esaki", señor Croes a duna di conoce.

El a remarca cu pa loke ta trata e reglanan di DTI, ta reglanan cu tin di haber cu e uzo di e auto riba camindanan di Aruba y ta keda den man di DTI. El a remarca cu DTI mes mester duna informacion y conscientisa usuarionan di e reglanan aki y di kico mag of no mag di wordo uza na Aruba.

Esakinan ta conta tambe pa autonan nobo cu a wordo compra y no ta cumpli cu reglanan di trafico y di DTI, y ta core rond pa dos aña prome cu nan mester keur. Mientras cu nan entrada no ta prohibi, Douane ta laga nan drenta mientras nan ta cumpli cu reglanan di Douane.



ESTILO *Salud ★ Moda ★ Beyesa*

Segun expertonan

Un simpel custumber mainta cu ta proteha presion riba termino largo



No bebe awa ora bo lanta por tin consecuencia pa salud cardiovascular, expertonan ta adverti. Segun EatingWell, falta di hidratacion mainta ta mantene e curpa den un estado di deshidratacion leve y ta activa mecanismonan hormonal cu ta contribui na un aumento gradual di presion di sanger.

E fenomeno a wordo analisa den estudionan internacional y ta haya respaldo di organisacionnan manera e Asociacion Mericano di Curason (AHA).

-Deshidratacion y precion di sanger mainta Ora bo lanta mainta, e curpa ta experencia un aumento natural di presion di sanger debi na e ritmo circadiano y e accion di hormonanan

manera cortisol y adrenalina. Segun Dr. Michelle Cardel, director di nutricion consulta pa EatingWell, “nos presion di sanger ta aumenta naturalmente den oranan trepan di mainta, y loke nos ta haci e ora ey por amplifica of atenua e aumento aki.”

AHA ta sostene cu hidratacion insuficiente por afecta funcion vascular y promove e desaroyo di hipertension, specialmente den hende cu un historia familiar of factornan di riesgo.

Un estudio di Instituto Nacional di Salud di Merca (NIH) a indica cu esnan cu ta consumi por lo menos seis glas di awa diariamente tin un riesgo mas abao di hipertension compara cu esnan cu ta bebe solamente un.

E autornan a señala cu “bebe suficiente awa ta parse di ta un factor protectoro contra hipertension.”

Deshidratacion ora di lanta ta stimula e liberacion di hormonanan manera vasopressin y e sistema renina-angiotensina-aldosterona, cu ta responsabel pa regula presion di sanger y balansa di likido. Michelle Routhenstein, un dietista registra specialisa den salud cardio-

vascular, a splica riba EatingWell cu “no bebe awa den oranan di mainta ta tene bo un poco deshidrata, loke ta activa hormonanan manera vasopresina y e sistema di renin-angiotensina-aldosterone.”

Segun Cleveland Clinic, e reduccion den volumen di sanger ta diki e sanger y ta forsa e curason pa pomp mas duro, loke ta contribui na un aumento di presion di sanger. Un prueba clinico publica den e revista Nutrients a demostra cu bebe 550 mililiters di awa asina bo lanta por reduci presion di sanger sistolico den adultonan cu glucosa eleva y mehora funcion di nir.

E preocupacion di e specialistanan ta sinta den e efecto acumulativo. Cardel a señala cu “habitualmente cuminsa e dia deshidrata, hunto cu consumo di koffie, exceso di salo, stress y un estilo di bida sedentario, ta subi presion di sanger mainta repetidamente.”

Organisacionnan manera e Mayo Clinic y e National Academies of Sciences ta recomenda pa hende muhe bebe por lo menos 2.7 liter di likido diariamente y hende homber 3.7 liter, incluyendo awa, te y fruta.

Consumo di koffie mester ta despues di bebe awa, limitando e cantidad diario na dos copi. Cafeina por aumenta presion di sanger temporalmente, pues no ta recomendabel pa bebe esaki riba stoma bashi.

Celebridadnan a revolucionar moda na Milan cu estilo monocromatico y moderno

Na e ultimo edicion di Siman di Moda di Milan, celebridadnan ta pone tendencia no solamente riba e pasarela, pero tambe den e tribuna y riba caya. E muestra di estilonan a varia di clasiconan monocromatico te na looknan audaz cu hint di briyo y colornan contrastante. Bril scur y super grandi tabata un accesorio cu a destaca durante e siman aki.

-E cacho den brasa di Demi Moore a horta tur mirada. Demi mes a luci un jumpsuit di cuero preto fit, cu un corte stret cu a acentua e figura di e actriz. Bril di solo grandi y su cabey cortico, cu un ‘wet look’, a duna un estilo moderno y urbano.

-E mirada intenso di Emilia Mernes, acentua pa makiyahe di wowo scur y lipnan neutral, a capta atencion durante Siman di Moda di Milan. E bisti cortico di oro, traha di net metalico cu rand y fringe largo, a crea un efecto geometrico impresionante.

-Madonna a luci handschoen blauw electrico y bril di solo grandi durante e show di Dolce & Gabbana Herfst/Winter 2026/2027. E accesorionan aki a kibra su look monocromatico preto. E shimis cortico di satin, embece cu detayenan di canchi y pega cu un corset, tabata combina cu un jacket preto riba su schoudernan.

-Pa e show di Gucci, Donatella Versace su hilchi preto y punta a capta atencion di tur hende, acentuando e liñanan impecabel di e jas cora intenso cu tabata e strea di su look.



E jas tabata di estilo clasico, cu botonan cu e logo di Gucci color oro. Cu su bril di solo scur y cabey blond los riba su schoudernan a enfatisa su estilo personal.





**The Eighth
Continent, INC.**
Import & Export



Arendstraat 103 Oranjestad Aruba P.O. Box 440, Aruba
Tel: (297) 582-1304, Fax: (297) 583-5083
Website: www.tecaruba.com

Minister Geoffrey Wever ta lansa "Entrepreneurs Policy" y "Export Policy"

*Pa acelera diversificacion economico y fortalece posicion internacional di Aruba

ORANJESTAD (AAN): Minister di Finansa, Asunto Economico y Sector Primario, mr. Geoffrey Wever, ta presenta oficialmente e Maneho pa Empresarionan (Entrepreneurs Policy) y e Maneho pa Exportadonan (Export Policy). E dos manehonan aki ta forma un cuadro strategico integra cu lo acelera diversificacion economico, fortalece competitividad y amplia participacion di companianan local den mercado internacional. E iniciativa aki ta un paso concreto den ehecucion di e Programa di Gobernacion AVP-FUTURO 2025-2028, cu ta pone enfasis riba diversificacion economico, innovacion y desaroyo di un economia duradero.

Un economia resistente mester ta basa riba mas di un solo pilar. Cu e Entrepreneurs Policy y Export Policy, Gobierno ta crea un fundeshi solido pa mas iniciativa local, mas crecimiento y mas presencia internacional di nos empresarionan.

Negoshinan chikito y mediano (SMEs) ta representa 96% di negoshinan activo na Aruba, ta genera 42% di empleo den sector priva y 36% di salario na nos pais. E Maneho pa Empresarionan ta

establece un roadmap cla pa elimina obstaculonan, simplifica proceso y stimula iniciativa comercial riba henter e isla. E maneho ta enfoca riba fortalecimiento di educacion y entrenamiento pa empresarionan y empleadonan, adaptacion na cambio tecnologico, simplificacion di proceso administrativo, reduccion di carga reglamentario, mehora acceso na financiamiento y refuerzo di servicio di sosten y desaroyo empresarial. E meta ta pa crea un clima di hasi negoshi mas eficiente, accesibel y competitivo, unda SMEs por crece y amplia nan impacto economico.

Paralelamente, e Maneho pa Exportadonan ta dirigi riba un meta strategico concreto: diversifica e economia di Aruba fuera di turismo y converti exportacion den un growth pathway mas accesibel pa mas negoshinan local. E maneho ta reconoce cu Aruba mester amplia e cantidad y diversidad di empresanan cu ta exporta producto y servicio, particularmente SMEs cu tin potencial pa drenta mercadonan regional y global. Pa logra esaki, Gobierno lo cultiva un cultura pro-export, fortalece sosten institucional pa exportadonan nobo



y exportadonan den etapa tempran, reduci gasto, riesgo y bareranan practico, y mehora coordinacion y claridad den proceso di exportacion. Atencion especial lo wordo duna na exportacion di servicio y actividadnan digital, como oportunidad real pa diversificacion economico.

"No por depende solamente di un sector. Exportacion mester bira un growth path-

way real pa mas negoshinan local. Esaki ta parti di nos vision pa un Aruba mas diversifica, mas innovador y menos vulnerabel," asina Minister Wever a expresa.

E dos manehonan aki ta integra den un strategia economico mas amplio cu ta inclui maneho fiscal pa desaroyo di Oranjestad y San Nicolas, ahustenan den acuerdo pa starters, modificacion den

trato fiscal di beneficiarionan secundario di empleo y decreto nacional tocante actividadnan di servicio permitiden zona liber.

Implementacion lo wordo ehecuta door di colaboracion estrecho entre ministerio, partnernan institucional y sector priva, cu enfasis riba coordinacion, comunicacion y revision periodico pa garantiza progreso y resultado concreto.

Minister Wever ta gradici y felicita e team completo na DEZHI cu a traha duro ariba e dos polycynan aki cu lo tin un impacto positivo pa e economia y entrepreneurs di Aruba. Cu e Entrepreneurs Policy y Export Policy, Gobierno ta reafirma su compromiso cu un economia mas resiliente, mas competitivo y cla pa futuro, unda empresarionan local por cuminsa, crece, innova y competi den mercado internacional.

E Entrepreneurs Policy y Export Policy ta publica riba varios lugar online, Entrepreneurs Policy y Export Policy lo wordo publica riba e website di Directie Economische Zaken (www.deaci.aw), IDEA (www.idea.aw), Exprodesk (www.exprodesk.com).

Momentonan yen tristeza na ImSan

Dialuna mainta a informa personalmente tur empleado cu nan Director a fayece

ORANJESTAD (AAN): Dialuna merdia, e Junta di Directiva y Management Team di Instituto Medico San Nicolas (ImSan) a confirma e fayecemento di nan director Drs. Joel Rajnherc. Despues di a hiba un lucha grandi cu su salud durante e ultimo aña, y a logra vence cancer, lamentablemente a confronta complicacionnan



secundario y Dialuna marduga a ricibi e tristo noticia cu Drs. Joel Rajnherc a bay sosega.

Management Team di ImSan a tuma e decision pa informa personalmente cada un empleado riba Dialuna mainta mirando e conexion personal cu cada un di e empleadonan tabata tin cu e director.

Drs. Joel Rajnherc no tabata sin mas un director, e tabata un persona cu tabata stima cada un di su empleadonan directamente. E tabata conoce cada un di nan directamente den un forma unico y semper tabata pendiente pa cada un di nan.

Drs. Joel Rajnherc tabata un lider excepcional y un mentor cu un vision enorme pa locual ta trata salubridad y cuido medico na Aruba en general, pero primordialmente e tabata e curason pa cu nos hospital Instituto Medico San Nicolas ImSan.

Drs. Joel Rajnherc a sa di dedica añanan largo di servicio medico na e comunidad

di Aruba como pediatra inicialmente y consecuentemente como director di nos hospital Instituto Medico San Nicolas ImSan caminda cu el a sa di toca y influencia bida di hopi persona den un forma unico. Drs. Joel Rajnherc ta laga un legado enorme atras, no solamente pa cu e comunidad di Aruba, pero tambe sigur pa cu e famia completo di nos hospital, Instituto Medico San Nicolas ImSan, cu sin duda lo sa di carga y continua cu esaki cu integridad, perseverancia y cu amor pa cu e comunidad di Aruba. "Nos director Drs. Joel Rajnherc ta laga un bashi inmenso atras," ta loke nan a declara.

Hunta di Directiva y Management Team di Instituto Medico San Nicolas ImSan ta manda palabranan di forsa y sincero pesame na su señora Sandy, su yiunan Cassandra (Sam) y Joel (Riven), demas famia y tambe na e famia completo di nos hospital Instituto Medico San Nicolas ImSan.

Parlamentario Xiomara Maduro suplicando pa madurez politico den maneho di salubridad

ORANJESTAD (AAN): Gobernacion ta exige madurez di parti di su mandatarionan. Ora un hende ta ocupa un puesto ministerial, e no por keda actua ni pensa manera si e ta den oposicion, y pa colmo sin bin cu solucion concreto. Un minister mester por compronde e raiz di un problema y sa di distingi claramente kico ta un medida y kico ta un solucion structural.

Durante e reunion publico riba e situacion di nos grandinan, Parlamentario Xiomara Maduro a critica e hecho cu Minister Mervin Wyatt-Ras ta keda pone enfasis y papia di “medida, medida” manera e tabata haci den oposicion. Sinembargo awe como minister, sra Wyatt-Ras tin otro responsabilidad y ya caba mester cuminsa muestra dominio di su



ministerio y madurez politico den su decisionnan.

Parlamentario Maduro ta referi especificamente na e expresion di Minister Wyatt-Ras riba

“medida di corta den medicina”. Ta parece cu ainda e Minister no a compronde cu e “medida di corta den medicina” tabata e prome condicion cu Hulanda a

impone pa Aruba haya yudansa financiero den pandemia. Un condicion cu a afecta hopi hende, specialmente nos grandinan.

Segun Maduro, si tin madurez politico real, e minister mester a reconoce cu e tipo di medida aki y ehempel duna pa Hulanda, ta rason suficiente pa Aruba bisa “NO” na Rijkswet HOFA. Aruba no por duna Hulanda oportunidad pa bolbe impone medidanan riba nos pueblo y nos grandinan.

E parlamentario a agrega cu ya caba den hospital ta sigui regla Hulandes na unda un hende ta grandi, no tin mesun balor pa inverti mas den su salud, paso e hende ta “grandi caba”. “Esey no ta nos cultura”, Maduro a enfatisa, mustrand su preocupacion pa e trato y balor cu nos grandinan merece.

Madurez politico, tambe ta exige pa e minister realisa cu e situacion financiero actual no a surgi di nada. BBO na frontera no a “cay fo’i shelo” esey mester a bin pa paga pa e debe cu sra Wyatt-Ras mes como Parlamentario a laga Eman yena Aruba cune. Awe, segun Maduro, ta ironia di bida cu e mesun fondonan y mecanismo financiero ta wordo uza pa paga pa proyectonan y duna alivio na nos grandinan.

“Sin placa no por paga debe, no por haci proyecto, y no por haci inversion necesario pa nos grandinan,” e parlamentario a conclui, insistiendo cu e momento actual, ta pidi pa liderazgo cu responsabilidad, vision y madurez politico na bienestar di Aruba.

Entre 9 cu 13 di Maart na Carnival Village

Yamada pa scolnan, gruponan di baile, instancianan y fundacionnan cultural participa den FERIA Patriotico

ORANJESTAD (AAN): Comision Celebracion Dianan Nacional (CCDN) ta extende un invitacion na henter comunidad pa asisti n’e grandioso FERIA Patriotico cuminsando riba 9 di Maart 2026 te cu dia 13 di Maart 2026. Durante e FERIA Patriotico aki por disfruta di diferente tentnan conoci pa nan cuminda y pasabocanan crioyo, arte y articulonnan pa celebra nos dia di Himno y Bandera. E biaha aki CCDN a acerca entre otro scolnan basico y secundario, gruponan di baile, instancianan y fundacionnan cultural pa forma parti di nos celebracion historico den diferente forma manera creatividad den arte, declama poesia, baile, canto y mucho mas.

Scol secundario por laga nan alumnonan participa den forma di boluntario pa asina laga e hobennan

haya mas experiencia den e parti logistico pa cu nos eventonan cultural. Scol basico y secundario tambe por participa den e parti artistico (baile, canto, declama poesia, Teatro y mas). Instancianan cultural y social tambe ta forma parti di e feria cultural den forma di un exposicion di Bon Comun caminda lo tin nan booth pa expone nan producto y/of servicio y duna informacion na publico general.

Mirando cu nos ta celebrando 50 aña di nos Himno y Bandera y 40 aña di Status Aparte, Gobierno di Aruba a opta pa expone y celebra esaki grandemente e biaha aki cu mas dia, pa asina comunidad henter por disfruta den un ambiente di celebracion. Entrada pa e FERIA Patriotico ta completamente gratis. Esaki lo tuma lugha riba e fechanan



menciona na Aruba Carnival & Entertainment Village na San Nicolas di 7:00 pm - 10:00 pm.

E FERIA Patriotico lo conta cu musica, baile, arte, canto y demas actividadnan cultural pa entretene tur presente cu un ambiente cultural y patriotico.

Tur cu ta desea di participa na e FERIA Patriotico por haci uzo di e siguiente linknan, tuma nota cu e link ta sera dia 4 di maart 2026.

Pa bo ta boluntario den e parti logistico, of bo kier ta den forma artistico den cualkier forma den e pro-

grama, bay na e website aki:

www.bit.ly/feriapat

Bay cu bo famia y celebra nos 50 aña di Himno y Bandera y 40 aña di Status Aparte grandemente den un ambiente familiar y cultural den Carnival Village.

Centro di Bario Noord ta celebra:

Dia di Himno y Bandera cu "Fiesta Rubiano" y entrega di Premio "Ovito Tromp"

ORANJESTAD (AAN): - Centro di Bario Noord ta habri su portanan un biaha mas pa su tradicional actividad na ocasion di celebracion di nos Himno y nos Bandera riba 18 di maart 2026, den un "Fiesta Arubiano". Y e ana aki mas especial pasobra Aruba ta celebra e di 40 ana di pais Aruba y 50 ana di nos Himno y Bandera.

Fiesta Arubiano ta un evento cultural yena di color, ritmo y sabor, sensacion di camaraderia y unda e comunidad ta bin anualmente hunto.

E evento ta tuma lugar na Centro di Bario Noord di 12:00 pm te 6:00 pm y ta promete di lo ta un dia inolvidabel pa grandi y chikito. E programa ta hopi varia y yen di sorpresa:

- Show di Baile - Gruponan local lo presenta ritmonan folklorico y coreografianan impresionante.

- Declamacion di Poesia- Palabranan cu ta toca curason, presenta den varios idioma.

- Ganadornan di Festival - Talento di nos comunidad lo bay presenta nan piesa ganador riba escenario.

- Gruponan Tipico lo deleita publico

- Tambe lo tin un Skina pa nos muchanan - Actividadnan divertido y educativo pa e mas chikitanan.

- Bar lo ta bon surti - Refresconan y drinknan special lo tin pa mantene tur hende bon hydrata.

Durante di e celebracion di "Fiesta Arubiano" na CBN lo bay honra manera ya ta custumber un personahe cu lo ricibi e prestigioso premio "Meneer Ovito Tromp".

Premio Meneer Ovito Tromp



- Tin diferente Tentnan di Cuminda crioyo y Boca Dushi - Cuminda crioyo prepara cu amor.

Desde awe te 25 di februari 2026, tin e oportunidad pa manda un number(nan) di un



(of mas)

candidato acompaña cu un descripcion.

Aki e link pa registracion <https://shorturl.at/0QoHd>

Tambe por pasa CBN busca un formulario.

Tin un comision independiente, cu lo tin e tarea dificil pa propone un persona merecedor di e distinguido premio "Mr Ovito Tromp"

Laga nos "Save the date" y pasa na CBN riba 18 di maart benidero pa nos muestra cu nos tur ta

orguyoso di nos bario, nos cultura y nos hende y particular di nos Himno y Bandera y nos

identidad den un dushi celebracion di "Fiesta Rubiano". "Fiesta Arubiano" ta uni, celebra y disfruta di loke ta haci nos comunidad unico.

En Resumen "Fiesta Arubiano"

- Fecha: 18 di maart 2026

- Ora: 12:00 pm - 6:00 pm

- Lugar: Centro di Bario Noord, Noord 74

- Entrada: Gratis, un sonrisa

*Informacion over di programa lo sigui den simannan cu ta bin.

Encuanto Centro di Bario Noord

Centro di Bario Noord a ser funda na aña 1970 y ta celebrando su 55 aniversario di existencia y

impacto. CBN ta fungi como e curason di bario di Noord. Un lugar pa encuentro, pa siña, pa

desaroya, pa (re)crea, haci deporte y pa celebra. E ta un iniciativa di bario, pa bario, dirigi pa un grupo entusiasta di boluntarianan.

Tur hende ta Bonbini, en particular un invitacion special ta bay na nos dushi hendenan cu ta

forma nos bario di Noord pa asisti, celebra y engrandece nos cultura y duna honor na nos identidad.

Renobacion na Mabon ta trece orguyo y speranza pa su habitantenan

ORANJESTAD (AAN): Plan amplio di revitalisacion di bario cu a anuncia prome cu fin di aña, e proyecto di renobacion di e flatnan na Mabon, pronto lo yega na su fase final. E iniciativa ta parti di un esfuerso mas grandi pa drecha, modernisa y embeysa diferente bario, creando un ambiente mas digno, sigur y agradabel pa e residentenan.

Durante e proceso, diferente habitante a comparti nan experiencia y satisfaccion cu e cambionan realisa.

Julitza Croes, ama di cas, cu ta biba den e flat pa hopi aña, a expresa su emocion ora el a mira e transformacion:

"Nos flat a pasa di colorido den pasado, pero awa nos ta mira un cambio real. E renobacion a keda hopi




bon. Nan a traha lihe y di calidad. Awo nos por bisa cu nos tin un lugar mas bonito pa biba."

Un otro residente, Jadrick Lampe, cu ta biba den e flat pa shete aña, tambe a comparti su gratitud. El a destaca cu e cambionan, manera porta y bentana nobo, color modernisa y

mehoracion structural a crea un ambiente mas fresco:

"Ora bo mira tur loke a cambia, e ta manera un cas nobo. E ta motiva bo y e ta haci bo sinti orguyoso di unda bo ta biba. Mi ta gradici tur hende cu a haci esaki posibel"

Segun informacion for di e contratista, e trabaonan a inclui cambio di bentana porta, mehoracion di mu-



raya, seguridad riba trapi, portanan di entrada y salida, organizacion di parking y un color nobo pa e fachada. Tur esaki, ehecuta den un periodo relativamente cortico, manteniendo coordinacion estrecho cu e habitantenan.

Lo mas importante, segun e habitantenan, ta e sentimento di orguyo y renobacion cu e proyecto a trece. E flat cu antes ta-

bata muestra señalnan di desgaste, awa ta representa un simbolo di progreso y atencion pa bienestar di e comunidad.

E proyecto na Mabon ta un ehempel concreto di con inversion den bario por impacta directamente calidad di bida di su residentenan, no solamente den infraestructura, pero tambe den autoestima y sentido di pertenencia.



Parlamentario Edgard Vrolijk na Minister Gerlien Croes:

Minister tin cu duna cuenta y cu 'transparencia' no ta un opcion sino obligacion legal

ORANJESTAD (AAN): Durante e reunionnan di IPKO cu a tuma lugar fin di Februari, tabata tin un tema cu a resalta bou di e delegacion Hulandes: e biahe den jet priva di Minister Gerlien Croes. Den combersacion cu dos ex-Hues, kendenan tin un bista skerpi riba e materia aki, nan a expresa cu tin dos punto critico cu Minister Croes no por sigui ignora: transparencia absoluto y e reglanan estricto riba regalonan (gifts) pa un mandatario den funcion.

Un insulto na nos Constitucion y e derecho di Parlamento: Ta un berguensa nacional cu un Parlamentario mester acudi na un peticion di LOB (Ley di Openbaarheid van Bestuur) pa por haya informacion cu mester ta publico y accesibel. Den un democracia saludabel



y den e resto di Reino, ta un norma cu un Minister ta duna cuenta di su biahenan y gastonan sin pone tanto 'pero' na e asunto. Artículo III.16 di nos Constitucion ta duna un Parlamentario e derecho sagrado di ricibi informacion.

Preguntanan manera "Cuanto e jet a costa?" y "Ken a pag'e?" ta simpel, directo y fundamental. Si Minister Croes ta afirma publicamente cu e mes a paga pa e biahe di trabao aki, e ora e tin e obligacion moral y legal

di duna e prueba di pago. Transparencia no ta wordo bisa cu palabra, e ta wordo demostra cu recibo.

E bista riba Ley di Integridad: Un regalo of un infraccion? Si e Minister no por proba cu e mes a paga, e situacion ta bira legalmente precario. Conforme e Ley di Integridad, un biahe asina ta keda categorisa como un "gift" (regalo). Artículo 13 di e ley aki ta prescribi cu mester declara cualkier regalo dentro di un termino rasonabel. E termino ey a caduca caba.

Mas ainda, e Ley di Integridad ta dicta cu e Prome Minister mester informa Parlamento si un mandatario a ricibi regalonan. Esaki no ta un cuestion di "persigui" un Minister

mane Minister Gerlien Croes kier pretende. Esaki ta un cuestion di existi cumplimento cu e ley cu nos mes a vota pe den sala di parlamento. Ley ta ley, y pa un Minister, e mester ta e prome pa duna e ehempel.

ECodigo di Conducta: E limite di 250 Florin. Un otro punto unda e Minister ta den un disputa legal ta e Gedragcode (Codigo di Conducta) vigente pa ministernan. Artículo 5 ta bisa bon cla: un Minister y su pareha mester registra tur regalo. Sea ta placa, servicio, of un buelo den jet priva.

E regla di oro: Si e regalo ta bal mas cu 250 Florin, e Minister tin e deber legal di nenga esaki.

Un biahe den jet priva ta costa miles di Florin. Pues, pa cuminsa, legalmente e no por ni wordo "registra" pasobra e ta so-

brepasa e limite permiti. Si e Minister a acepta e biahe aki como regalo, el a actua contra e Codigo di Conducta. Si e mes pag'e, pakico e tin miedo di mustra e transfer anto?

Conclusion: Entre integridad y e berdad: Minister Gerlien Croes ta kibrando un derecho constitucional door di keda sin duna informacion. Den Reino esaki ta inaceptabel. Ora un Minister declara cu e mes a paga, e ta pone su mesun integridad den wega.

Si e no presenta prueba di e pago, e ora e ta admiti cu el a faya cu e Ley di Integridad y e Codigo di Conducta. "Minister Gerlien Croes, como Parlamentario, mi no ta persigui y mucho menos pidi un favor, mi ta simplemente existi pa e ley wordo respeta.

Pueblo merece transparencia, no excusa," Vrolijk a termina bisando.

CEDEHM Aruba ta invita comunidad pa participa na nan accion social 'Food and Clothes Drive'

ORANJESTAD (AAN): Den conexion cu celebracion di **Dia Internacional di Hende Muhe**, Centro di Desaroyo di Hende Muher – CEDEHM, ta lansa su accion social bou di e titulo #GiveToGain. Esaki ta un iniciativa basa riba solidaridad, dignidad y compromiso social. Señora Jahaira Valdez

di CEDEHM Aruba a informa cu, den colaboracion cu Red Cross Aruba, e organizacion ta organisa un **Food and Clothes Drive** pa yuda hende muhe mas vulnerable na Aruba. E colecta ta enfoca riba recoge alimento cu no ta dañá lihe y paña den bon estado, cu lo bay directamente pa hendenan muhe cu



ta pasa momentonan dificil. Pañanan por ta di baby, mucha muhe y mucha homber di tur edad te cu adulto. E aña aki tin un significado special, pasobra CEDEHM ta celebra su **15 aña di aniversario** — un logro cu ta marca mas cu un decada di trabou den defensa y em-

poderamento di hende muhe na Aruba. CEDEHM ta invita tur miembro di comunidad, famia, grupo na trabou, companianan y organisacionnan pa participa activamente y contribui generosamente door di hunto colecta paña y comestibel cu no ta dañá. Diasabra dia 7 di maart,

di 10or di mainta pa 4or di atardi por entrega esakinan na Avenida Milo Croes 28 (tegenover di Van Dorp na Dakota). Hunto nos ta duna. Hunto nos ta gana. Pa mas informacion of pa coordina donacionnan, por tuma contacto cu CEDEHM na 588-1391.

RESULTADO DI SORTEONAN PA CORTESIA DI CADENA ALEXANDER DIALUNA 2 MAART 2026

DIARIO	KORSOU	GATOCHI	ZODIAC
2854	3820	MERDIA 7195 2417 9792	ANOCHI 6770 3137 3201
8602	2544	MULTI- X	
2670	8674	X3	X2
TDFF	LUCKY 3	BIG 4	SUPER 4
MERDIA 6697	ANOCHI 5716	MERDIA 302 X2	ANOCHI 842 X2
		MERDIA 6563 X2	ANOCHI 3650 X2
LOTTO DI DIA	22-30-19-03-28		

EMERGENCIA NA ARUBA

Diamars 3 Maart 2026

DOCTER NA WARDA

SAN NICOLAS:
Pa San Nicolas, Docter lo ta na H.A.P. ImSan.
Dokter tey for di 6'or di anochi te 10'or di anochi.

ORANJESTAD:
Pa Oranjestad, Docter lo ta na Huisartsenpost H.A.P. na Hospital. Dokter tey di 6:30 pm te cu 10:30 pm.

BOTICA NA WARDA

PARIBA DI BRUG:
Botica Aloe NV
Pos Chikito 83
Telefon 584-4606

PABAO DI BRUG:
Botica Oduber NV
Caya Betico Croes 103
Telefon 582-1780

DIARIO

Loke Tempo ta Mustra....



•• Area di presion halto riba Atlantico ta pone cu biento ta sigui supla fuerte te duro na Aruba, y ta limita actividad di awacero den region. Stof mas modera di Sahara ta den region awe.

•• Biento di Pariba basta fuerte entre 20 y 39 km/h, cu rafaga te 61 km/h. Lama modera cu ola entre 4 pa 7 pia.

BUSCA PALABRA

A I E E R E P A P S S O
E A D P D N N D E I O S
D S R O N U N O O N B D
E D C E O E C T Z A P N
N T P O N L I A A N A A
E P S E L E T N O S E L
C E K C A A A O L E A R
E E B E U N R E P L T E
R A C N D O C E N T E D
S T R A A N E S S E L E
K S I S C H R I F T D N
E S Z P A U Z E N A O R
S T R B U K I N A N E E
T R E S N N R Z A T T A

Escolar	Lessenaar	Docente	Pauze
Nederlands	Rekenen	Educa	Lesnan
Bukinan	Schrift	Potlood	Pen

> SUDOKU <

King Classic Sudoku

	6		4	5	8	1		9
	8							
		5						7
	1		8	4				
		2				4	9	
						8	7	
		1	2					8
		9			4			
	5		3		7	6		

Difficulty: ★★★★★

7/30

Bisti bo Seatbelt

Pa cuatro anochi e rotonde aki na Balashi lo bay ta cera

ORANJESTAD (AAN): E compania encarga cu e proyecto di Green Corridor, ta haciendo tur anochi e siman



Hari Un Tiki

Ora cu e Bus a stop na un Bus halte, a nota cu e vehiculo tabata yen yen.

Tur e asientonan tabata ocupa, y cu hopi esfuerso un señora a logra subi, y a haye obliga di para mey-mey como cu no tin mas asiento.

E señora a ripara cu ningun hende a ofrese un stoel pa e sinta. El a mira cu tin varios homber sinta, pero ningun a lanta pa ofrese asiento. Aki el a bisa:

—“Ya no tin cabayero den e temponan aki!”

Un homber sinta a dune contesta nmesora:

—“Señora, cabayero tin, loke no tin ta stoel pa sinta”.

Solucion Anterior

7	4	3	6	9	1	2	5	8
9	2	1	8	5	7	6	4	3
5	8	6	3	4	2	9	7	1
3	5	8	1	6	9	4	2	7
2	7	4	5	3	8	1	6	9
6	1	9	7	2	4	8	3	5
4	9	7	2	1	5	3	8	6
1	3	5	4	8	6	7	9	2
8	6	2	9	7	3	5	1	4

Difficulty: ★★★★★

7/29



aki trabao di recap asfalt di e rotonde aki na Balashi.

Trabao lo ta for di 7:00 pm te cu 6:00 am. A cuminsa cu ne di ayera caba (2 di Maart), y lo sigui awenochi Diamars, tambe Diaranson, y finalmente riba Diahuebs anochi.

Ruta di desviacion lo ser haci via borchis cu baricada. Caminda lo ta cera for di rotonde Pos Chiquito bay te na rotonde di Sero Tijshi. Tambe for di cruzada di Mondri Fierno bay te na e T-weg dilanti WEB Aruba NV.



ALMANAC



**Bahada
y salida
di solo
na Aruba**

— **3 Maart 2026**
Solo ta baha: 6:49 p.m.
— **4 Maart 2026**
Solo ta sali: 6:54 a.m.
Solo ta baha: 6:50 p.m.
— **5 Maart 2026**
Solo ta sali: 6:54 a.m.
Solo ta baha: 6:50 p.m.
— **6 Maart 2026**
Solo ta sali: 6:53 a.m.
Solo ta baha: 6:50 p.m.



**Lista di
Crusero
di bishita
na Aruba**

— **Diamars 3 Mar. 2026:**
Carnival Horizon:
(08:00 - 22:00)
Seven Seas Grandeur:
(10:30 - 22:00)
Norwegian Sky:
(13:30 - 22:30)
— **Diaranson 4 Mar. 2026:**
Brilliance of the Seas:
(08:00 until Thursday 5th)
Ambassador Ship 3:
(09:00 - 18:00)
Brilliant Lady:
(10:00 - 22:00)
— **Diahuebs 5 Mar. 2026:**
Majestic Princess:
(07:00 - 16:00)
Serenade of the Seas:
(08:30 - 18:00)
Brilliance of the Seas:
(Debarks at 18:00)



Tel: 583-1190
Anonimo y Confidencial

Unidad Compania di Ehercito di Ministerio di Defensa den Caribe ta haciendo su rotacion



ORANJESTAD (AAN): Informacion for di Corsou ta indica cu durante un ceremonia militar riba djaluna mainta, 2 di mart 2026, Kompania Rotashon 50 a entrega su tareanan na e siguiente unidad, Rotacion 51. E Comandante nobo entrante, Capitan Marnix, a tuma e mando for di su predecesor durante un entrega di rema.

Despues di cuater luna intensivo den Caribe, Capitan Roderik ta wak bek cu satisfaccion riba e colaboracion y entrenamiento di Charlie/Tijger Company. E unidad a tene varios sesion di entrenamiento riba e varios islanan, hunto cu un elemento medico. Tabata un oportuni-

dad unico pa e unidad train den e clima tropical aki na Aruba, Bonaire, y Corsou. Asina a duna e peloton nan aki e oportunidad pa conduci entrenamiento tactico y desaroaya habilidadnan specialisa. E tereno di tiro na Curaçao ta ofrece e oportunidad pa conduci ehercicionan di candela bibo integra cu morteronan y sniper, sosteni pa sistemanan no-tripula y Drone. Tambe nan por a colabora cu militar nan di Corsou y Wardacosta. Tabata remarcabel pa mira con, apesar di diferencianan den antecedentenan y metodonan di trabao, nan por a contribui conhuntamente na seguridad y estabilidad.

Compania Bravo "Bull"

ta cuminsa cu su di cinco rotacion den Region Caribe. Capitan Marnix ta ancioso pa traha y entrena cu su unidad den e region. Como parti di Batayon 11 di Infanteria, 'Garderegiment Grenadiers en Jagers', nan ta wordo desplega normalmente for di Helicopter of cu parachute, dentro di e tres tareanan principal di e forsa arma. E compania ta provee poder di combate di calidad halto for di laira pa riba tera. Como un compania den West, e enfasis ta principalmente riba operacionnan na pia. E unidad lo wordo reforsa pa e proximo 4½ luna cu e capacidad medico di Compania Medico 11.

Ademas di ta prepara pa y



realiza misionnan pa CZM-CARIB, e enfoca ta riba un programa di entrenamiento interno pa prepara e unidad.

E clima y medio ambiente di e Region di Caribe di Reino ta ofrece un oportunidad excelente pa traha riba e desaroyo fisico y mental, liderato, y resiliencia di personal. Capitan Marnix y su team ta wak padilanti pa colabora cu partnernan di seguridad local

y spera cu e lo ta un contacto agradabel y un periodo util door di uza varios oportunidad di entrenamiento.

Ehercito Real di Hulanda tin un compania permanente den Caribe. E unidad aki, bao di mando di CZMCARIB, por wordo desplega pa un variedad di tarea. Durante e proximo cuater lunanan, e compania lo train na Aruba, Bonaire, y Corsou.

Playa Pabao lo trata Dia di Hende Muhe cu un charla encuanto hende muhe den periodismo

ORANJESTAD (AAN): Directiva di Centro di Bario Playa Pabao ta invita e ser femenino y nan pareha pa bin celebra "Dia Internacional di Hende Muhe" den nan centro. E anochi aki ta tuma diabierna dia 6 di maart anochi di 7:00 pm pa 9:00 pm. Orador invita pa e anochi aki ta sra Maritza Maduro, kende lo elabora riba e tema "Muhe den Periodismo".

Lo tin un ora social cu grupo di baile di CBPP, poemanan recita pa e poetanan Omaira Britten, Ruthy Vrieswijk y Ariana Koolman, cu ya por ser considera famia di CBPP.



Pues un programa hopi varia y no lubida e cantenan masculino.

Danki na tur instancia pa alegre e dia aki un crenchi mas. Den nomber di directiva di CBPP. Felis Dia di Hende Muhe diadomingo 8 di maart!

No Lubida nos actividad ta diabierna 6 di maart di 7.00 pm y lo termina 9.00 pm. Lo tin un treat pa esnan cu a asisti na e actividad aki.

E aña aki e tema di United Nations Women pa e dia aki ta 'Give To Gain'.

Columna E Sembrado



Diamars 3 maart. Di dos siman di Cuaresma aña 2026 Ciclo A

Calendario Liturgico

Lectura: Isaías 1, 10.16-20;

Salmo: 50;

Evangelio: Mateo 23,1-12;

"P'esey obedece y sigui tur cos cu nan bisa, ma no haci manera nan ta haci si! Pasobra nan mes no ta haci loke nan ta bisa. Mateo 23,1

Rumannan e Palabra di Dios ta siña nos cu nos mester ta atento, hopi hende ta papia bunita pero nan bida ta musta e contrario. Nos mester purba sigui e bida di Hesus. E no ta facil pero e recompensa ta Bida Eterno. Awo cu ta tempo di Cuaresma ban pidi Hesus laga nos cana hunto cu nE. Si nos conoce su Palabra ban bibe. Ban cana cu Hesus, ora nos trompeca pidi'E lanta nos bek. Bunita ta cay y lanta bek y reconoce cu nos a comete un eror y pidi pordon. Sea humilde.

Oracion: Dushi Hesus nos kier ta humilde, cana den Bo pasonan. Guia nos y musta nos cua ta e obra cu Bo kier nos haci den e Cuaresma aki. Laga nos papia y ta un ehempel di Bo den obra y nos bida diario. Amen.

Grupo Centro Pastoral Aruba

Parlamentaria Otami Thomasia:

'Bida bek den San Nicolas'

ORANJESTAD (AAN): Parlamentario Otami Thomasia, a comparti su opinion y expectativa riba e desaroyo cultural den e area di San Nicolas relaciona cu e celebracion nacional.

Segun Thomasia, un di e aspectonan mas valioso di e iniciativa ta, cu e proyecto a nace for di un grupo di San Nicolas mes.

"Mi ta hopi contento cu un grupo di Pariba di Brug mes a sinta hunto pa impulsa esaki. Hopi biaha nos ta mira cu otro hende



ta dicidi loke San Nicolas tin mester. E biaha aki ta diferente, e iniciativa a bin for di comunidad mes, y gobierno ta sostene esaki," Thomasia a expresa.

El a enfatisa cu e recono-

cemento di un figura manera Julio Bernardo Euson no mester keda solamente na un mural, pero mester bira parti di enseñansa.

"E personanan aki ta parti di nos historia como isla y como San Nicolas. Nos mester integra esaki den curriculum di nos scolnan. E muchanan mester sa con importante un artista por ta, con Aruba por logra reconocimiento mundial y cuanto premio nos a gana internacionalmente. E mural ta importante, pero e historia mester sigui den

enseñansa."

Segun e parlamentaria, e proyecto ta simbolisa algo mas grandi: un señal cu San Nicolas finalmente ta haya atencion y inversion despues di hopi tempo di espera.

"E iniciativa aki ta bisa cu nos ta pone bida bek na San Nicolas y na nos cayanan. Pa hopi tempo San Nicolas tabata wardando pa su beurt. Awo nos ta mira movicion."

Un paso den un proceso mas amplio: Un otro habitante di San Nicolas a comparti un perspectiva similar pero realista, indicando cu aunke e mural no ta e prioridad mas urgente,

e ta un paso den direccion corecto.

"E no ta lo mas importante na e momento aki, pero e ta eleva San Nicolas. E ta un comienso. Nos tin otro trabao grandi pa enfoca ariba dje, pero nos mester cuminsa somewhere. E muralsnan y renobacionnan ta un first step, un parti importante di e puzzle."

E combinacion di orguyo cultural, participacion comunitario y inversion gradual ta marca un fase nobo den e proceso di revitalizacion di Pariba di Brug, caminda cultura, historia y identidad ta hunga un rol central den e desaroyo di San Nicolas.



Cuminzando e weekend aki

Di awor en adelante ta riba tur Diasabra tin Mercado Santa Rosa

ORANJESTAD (AAN): For di algun aña caba Departamento di Agricultura, Cria y Pesca, Santa Rosa ta organizando su Mercado Santa Rosa riba diasabra. Esaki ta debi na e demanda pa cumpra y ta mas alcansabel productonan local fresco produci. Nos clientela den mayoria caso ta pidi pa esaki. Logicamente nos departamento a yega na e conclusion pa organiza esaki den un escala mas chikito cu entre otro 15 pa 20 productor local cu ta bin ofrece nan producto. Tratanto tambe pa organiza esaki maske ta un biaha pa luna.

Na luna di Januari e aña aki nos a ranca sali cu nos prome Mercado Santa Rosa di cual un biaha mas tabata masha exitoso. Nos bishitantenan a yega for di tur parti pa haci nan compras y combersa den ambiente placentero y probecha



tambe pa disfruta di prijsnan alcansabel pa nan cartera. Esaki no ta un mercado grandi manera ta nos tin custumber di organiza. Esun di riba diasabra ta enfoca mas riba nos productonan local den un escala mas chikito, facil conveniente y rapido.

Diasabra awo 7 di maart cuminsando for di 8'or di mainta te cu 12'or di merdia un biaha mas lo bay

ta e caso caminda nos ta extende un invitacion na Aruba completo pa pasa haci nos un bishita awor cu orario extendi y haci bo compras di productonan fresco produci for di nos mesu suelo. Manera ta custumber varios di nos producto local ta aki den nos mercado so bo por hay'e. Asina ta no perde e oportunidad aki di bin probecha y pasa un rato ameno y cu

prijsnan alcasbel. Lo bay tin entre otro carni fresco, fruta y berdura fresco y sin laga afo productonan natural. Pasabocanan dushi traha na cas pa nos mesun hendenan.

Nan ta notifica clientela di Mercado Santa Rosa cu despues di dia 7 di maart awor nan lo continua riba tur diasabra aki mes na Santa Rosa cu nos for di 8'or di mainta te cu 12'or

di merdia y asina complaciendo tur nos clientela cu ta desea di cumpra productonan fresco riba tur diasabra awor esaki ta bira posibel.

Asina ta marca bo calendario for di awor riba tur diasabra por bishita Mercado Santa Rosa pa cumpra bo producto. Nos mester menciona si cu posiblemente lo bay yega un momento cu kisas no tin suficiente producto local e ora nan lo informa lectornan cu un of otro Mercado Santa Rosa lo wordo posponi debi na falta di produccion.

Pa e weekend aki di diasabra 7 di maart bo ta cordialmente invita pa haci nan un bishita for di trempan 8'or di mainta te cu 12'or di merdia pa Mercado Santa Rosa den un formato mas chikito pa abo por probecha di locual ta bay tin pa ofrece.

DEPORTE INTERNACIONAL

Padres a firma contrato di Liga Menor cu Verdugo

SAN DIEGO: San Diego Padres a bay di acuerdo pa firma un contrato di Liga Menor cu hungador veterano di outfield Alex Verdugo, segun Kevin Acee di The San Diego Union-Tribune.

Verdugo no a ricibi un invitacion pa Spring Training di Major League y ta bay reporta na e camp di Liga Menor.

E hungador di 29 aña a pasa temporada di 2025 cu Atlanta Braves y a caba cu un OPS di .585 den 56 wega.

Pa e club di Major League, despues cu den 9 wega cu Triple-A Gwinnett el a caba cu un average di bateo di .207 y un promedio di yega base di



.303.

Verdugo te ainda a aparece den 856 wega den Major League y tin un OPS di .732 pa su carera.

Messi cu dos gol pa yuda Inter Miami bin bek pa gana despues di ta perdi 2-0



ORLANDO: Na halftime e fanaticonan di Orlando City tabata hopi contento, mirando cu tur cos tabata indica cu nan club tabata tin un bon chans di gana nan wega di MLS contra Inter Miami.

Esaki despues cu Orlando a tuma un ventaja di 2-0.

Sinembargo, Miami a bin bek pa gana e wega 4-2.

E prome gol di Orlando City a wordo anota pa Marco Pasalic den di 18

minuut y apenas 6 minuut despues e publico a bira loco ora cu Martin Ojeda a anota e 2-0.

Sinembargo, den di dos mitad Inter a domina e wega.

E 2-1 a wordo anota pa Mateo Silvetti den di 49 minuut y den di 57 minuut Lionel Messi a anota e 2-2.

Den di 85 minuut Telasco Segovia a anota e 3-2 y pa segura e victoria Messi a anota e di 4 gol pa Miami den di 90 minuut.

Queta cu 27 punto pa yuda Celtics gana 76ers



BOSTON: Neemias Queta Diadomingo pa prome biaha den su carera a anota 27 punto y a caba cu 17 rebounds, pa yuda Boston Celtics bin bek y gana Philadelphia 76ers 114-98.

Jaylen Brown a contribui cu 27 punto, 8 rebounds y 8 asistencia pa Boston, cu a bira e di 4 ekipo e temporada aki pa yega 40 triunfo.

Celtics a gana 6 di nan ultimo 7 weganan.

Di otro banda, e maximo anotador pa 76ers tabata Tyrese Maxey cu 33 punto y 6 asistencia, mientras cu

VJ Edgecombe a contribui cu 23 punto pa Philadelphia cu a perde pa prome biaha den 4 wega.

Bulls na dado momento a anota 27 punto consecutivo pa gana Bucks



CHICAGO: Diadomingo Josh Giddey a caba cu 20 punto, 14 rebounds y 10 asistencia pa logra su di 8 triple-double di temporada, pa yuda Chicago Bulls bin bek y gana Milwaukee Bucks 120-97.

Bulls cu e triunfo a kibra nan racha di 11 derota consecutivo.

Na dado momento Bulls a anota 27 punto sin cu Milwaukee a anota. Collin Sexton a contribui pa Chi-

cago cu 22 punto y Matas Buzelis a termina cu 20.

Den luna di Februari Bulls tabata tin un record di 0-11, unda cu ultimo biaha cu nan a gana tabata riba 31 di Januari na Miami.

Maximo anotador pa Milwaukee tabata Bobby Portis cu 18 punto.

Na dado momento laat den wega Bucks a gana 17 intento di anota consecutivo.



Noticianan for di Hulanda

Mas cu 1000 pasahero Hulandes por lo pronto pega den Medio Oriente



DEN HAAG: Te cu Dialuna ainda no tabata cla con e alrededor di 1000 turista Hulandes cu ta pega den Medio Oriente lo regresa nan pais.

No tin rutan alternativo, pues pa aworaki nan no por regresa Hulanda, segun vocero di organizacion di biahe ANVR, Hanita van der Meer.

Mientrastanto diferente organizacion di biahe ta trahando riba e regreso di biaheronan cu entre otro for di Asia ta bula bek via Medio

Oriente.

Nan lo pasa entre otro via Istanbul.

“Na mes momento hunto cu nos miembronan nos ta busca rutan alternativo pa logra manda hende cas, pero te ainda no tin, segun Van der Meer.

A consecuencia di e atakenan di Israel y Merca riba Iran, hopi aeropuerto den Medio Oriente ta cera. Iran tambe ta ehecuta contra atakenan y Dubai ta un di e paisnan cu a wordo afecta pa esaki.

Air France-KLM ta e perdedornan grandi riba e bolsa di balor di Amsterdam debi na inkietud den Medio Oriente



AMSTERDAM: Dialuna Air France-KLM tabata un di e perdedornan riba e bolsa di balor di Amsterdam.

Productor di productionan di gas y petroleo manera Shell di otro banda a probecha di e aumento grandi

di e prijs di petroleo y gas, a consecuencia di e atakenan di Merca y Israel riba Iran. E accionan di Air France-KLM a baha cu casi 7%, mientras cu e accionnan di Shell a subi di balor cu 7%.

Otro aerolineanan grandi tambe tabata bao di presion debi na cancelacion di varios buelo di Medio Oriente y e prijs di combustible cu a aumenta bastante.

Trahador part time di opvang pa mucha na Amsterdam sospecha di comete actonan sexual cu mucha



AMSTERDAM: Persona cu ta traha part time cerca un opvang pa mucha na Amsterdam ta wordo sospecha di e mishi cu dos mucha na un manera inapropia. Banda di esaki Ministerio Publico ta acusa e sospechoso di Almere di produci pornografia infantil unda cu dos otro mucha lo tabata envolvi.

Segun ANP e sospecho di 2022 te cu Februari di 2025 tabata miembro di hunta di municipio pa partido 50PLUS na Almere.

OM a duna di conoce cu tin 9 mucha mas cu ta victima di e sospechoso.

Tin potretnan sunu saca di e muchanan aki, pero sin cu bo ta wak actonan sexual.

Pintura toch a resulta di ta di Rembrandt



AMSTERDAM: Rijksmuseum a descubri un Rembrandt nobo.

Ta trata di e pintura Het visioen van Zacharias in de tempel di 1633.

Un investigacion profundo di 2 aña largo a mostra cu di berdad ta trata di un obra pinta pa Rembrandt, e museo a meld Dialuna.

E pintura semper tabata den mannan priva.

E propietario actual a cumpra e pintura na 1961.

Un aña anterior expertonan a ex-

amina e obra y a bisa cu no tabata di Rembrandt.

Desde e tempo ey e pintura no a wordo examina pa expertonan, te ora cu e propietario 2 aña pasa a tuma contacto cu Rijksmuseum.

Cu tecnicanan mas avansa, cu den añanan 60 no tabata disponibel, e expertonan a compara e pintura cu otro obranan di Rembrandt di e mesun periodo.

Na final a conclui cu tabata un pintura di Rembrandt.

Noticia Internacional

Conflicto cu Iran den Medio Oriente

Prijs di petroleo ya caba a subi cu 8 porciento na mundo

LONDON: Siman a habri y e prijs global di petroleo crudo a subi cu como 8 porciento, y hopi mercado di bolsa a cay, e momento cu guera cu Iran a drenta su di tres dia. Iran riba Dialuna un biaha mas a manda monton di misil den region, incluyendo rumbo pa Arabia Saudita.

Crudo tipo Brent, tabata den teritorio halto di \$70 pa bari, despues cu tur trafico di tanker di crudo y gas LNG a stop completamente den e canal di Estrecho di Horuz.

E prijs ta un aumento grandi for di prome cu e atakenan a start Diasabra, pero e no ta leu di un escenario espantoso. Pero toch tin varios analista cu ta teme cu e prijs lo por pasa e nivel di \$100 pa



bari, si e interrupcion di trafico wordo obstaculiza pa tempo hopi prolonga, of si e guera plama y bay pa otro paisnan y ta destrui infraestructura di petroleo.

Arabia Saudita a bisa cu nan a tira y benta abao dos Drone di Iran cu tabata bayendo rumbo pa un refina-

ria, mientras cu Qatar a indica cu dos facilidad di gas natural a wordo ataca.

Prijs di bolsa di DOW Jones a cay Dialuna mainta cu hasta 600 punto. Pero pa awo e inversionistanan lo djis wanta y keda vigila ki desaroyo nobo lo bin.

Qatar a benta 2 avion di Iran abao

DOHA: Ministerio di Defensa di Qatar a confirma cu su pais a tira y tumba abao dos avion bomber Su-24 di Iran, marcando e prome biaha cu un pais a benta tira y tumba avion Irani desde cu e ultimo conflicto a cuminsa. Asina e involucramento di Qatar a escala tambe.

Qatar a splica cu nan a intercepta 7 misil balistico cu nan defensa aereo, y a destrui 5 Drone di Iran. Hecho ta cu Qatar tin tur capacidad y recurso pa salvaguardia e soberania y e pais, pa responde contra cualkier menaza externo.

Qatar a bisa cu nan compania estatal QatarEnergy a stop produccion di gas LNG, despues cu Iran a ataca nan facilidad na Ras Laffan.

Cuatro soldat Mericano morto te awo

WASHINGTON: Pentagon di Merca a confirma, cu te cu Dialuna merdia, un total di 4 soldat Mericano a perde nan bida den e conflicto di guera cu Iran.

Gruponan sosteni pa Iran a cuminsa yuda den atake, y e ultimo soldat a muri di heridan cu el a ricibi desde Diasabra.

Den 2 luna Vladimir Putin a perde dos aliado esta Maduro y Khamenei

MOSCU: Mas di un aña pasa, Rusia tabata celebra e yegada na poder di Donald Trump. Pa Putin e pensamiento tabata cu Donald Trump lo bay haci bida di Rusia mas facil.

Pero den e ultimo dos lunanan aki, Putin a keda tiki mas debil, ora cu su aliananan den exterior, esta e lider chavista Nicolas Maduro a wordo secuestra, y awor e lider supremo Ali Khamenei di Iran a wordo mata den atake.



Cuba den skina sin salida, Armenia poniendo su wowo riba Washington, companianan y tankeronan petrolero Ruso bao sancion, asalta pa forzanan special Mericano, y e clientenan di crudo Ruso manera India awor ta buscando forma pa haya luz berde di Merca pa por haya crudo.

Riba Diadomingo Putin a declara cu e matamento di Khamenei y varios di su famia, ta un violacion di tur norma di moral humano y di derecho internacional, via di un carta di condolencia manda pa presidencia di Iran. Pero manera a socede cu Venezuela na Januari, el a djis duna palabra di solidaridad pero ningun promesa di apoyo real na su aliadonan, aunke aña pasa Iran y Rusia a firma un acuerdo mutuo di defensa.

Awor ta Hezbollah tambe a cuminsa ataca Israel

TEL AVIV: E grupo di Hezbollah a dicidi pa nan tambe involvi nan mes den e conflicto na Medio Oriente, y a lanza par di raket den direccion di Israel riba Diadomingo.

Relaciona cu esey, Israel a responde cu cantidad di

misil cu a cay y causa explosionnan grandi den ciudad di Beirut, ocasionando destruccion na blanconan militar.

Israel a indica cu Hezbollah no mester kere cu nan ta dedicando 100% den atakenan riba Iran, pero lo reacciona riba cualkier agresion.

NOTICIA FOR DI COLOMBIA

TEMBLOR DI 5.3° REGISTRA RIBA DIADOMINGO

CUCUTA: Un temblor cu un magnitud di 5.3° riba Scala di Richter, a sacudi parti di departamento di Norte de Santander riba Diadomingo marduga. E sacudimento a star pa 5:12 am, y e epicentro tabata na 179 km bao tera, y a wordo localiza cerca di municipio di Salazar, segun un boletin di Servicio Geologico Colombiano. E epicentro tabata na 7.71° Nort y 72.91° West. Esey ta 13 kilometer di Salazar, cu ta igual cu 14 kilometer leu di Arboledas, y igual cu 23 kilometer di Gramalote, tur den departamento di Norte de Santander. Como cu e epicentro ta hopi hundo, esaki ta reduci e riesgo di dañonan structural severo, compara cu ora e epicentro ta hopi superficial. Ningun informacion a drenta di daño, aunke hopi hende a sinti e sacudimento.



FEBRUARI TABATA MENOS VIOLENTO DEN 50 AÑA

MEDELLIN: Statistica a indica cu luna di Februari 2026 ta awor oficialmente e luna cu menos asesinato registra na Medellin, desde cu a cuminsa registra casonan fatal violento. Den 50 aña di conteo, esaki ta prome biaha cu a registra solamente 11 homicidio den e 28 dianan di Februari. E ta hopi abao cu e lunanan di



April 2024 y Mei 2024, cu tabata e lunanan menos violento cu 17 asesinato. Aunke autoridad kier pa e cifra aceptabel ta 0 asesinato, como cu ta trata di bida di un hende, toch e ta un reduccion substancial. Esey ta loke alcalde Federico Gutierrez a indica. El a felicita Polis, Ministerio Publico, Ehército, y team di Alcaldia. E tendencia di caida di asesinatonan na Medellin a cuminsa despues di e pandemia di Covid-19, y na comienso a pensa cu e tin di haber cu restriccion pa mitiga e malesa entre 2020 y 2021, pero sin e medidanan aki toch keto bay tin menos asesinato, y desde 2022 e no a sobrepasa e cifra di 400 asesinato mas pa aña. E cifra mas abao te cu awor tabata 2024, ora cu Medellin a registra 310 asesinato. Pa duna un ehemplo con grandi e reduccion ta, pensa riba aña 1991 ora cu tabatin 6.809 asesinato na Medellin, pues ta igual cu 18,6 matamento pa dia e tempo aya. E tabata e ciudad cu mas matamento di henter mundo e tempo ey, tempo di uera grandi cartelnan di narcotrafico.

DJ DEVER TA BIBO Y AWOR KIER BAY BIBA AFO

BARRANQUILLA: E conocido DJ Dever kende tabata perdi recientemente, y cu a pone cu un buskeda masal a



start tanto pe, y tambe pa su chauffeur y su tecnico di instalacion di fiesta, a aparece cu bida. El a indica cu el a keda como 70 ora wanta door di gruponan. E oranan largo aki a pone cu el a pensa hopi y a hasta haya gana di stop cu eventonan di musica, y loke a pasa aden, a dune hopi gana di bandona Colombia y bay biba den exterior. E DJ a bisa cu e oranan den isolacion y angustia a pone pasa den e episodio mas duro y complica di su bida. Polisnan a core hibe na clinica pa check su salud, y despues por a regresa cerca su famianan, kendenan a ricibie cu alegria.

Noticia Internacional

Awor Iran uzando misilnan cu ta habri na final den clusters Iran a bisa di lo sigui intensifica bombardeonan riba Israel



TEL AVIV: Iran ta sigui indica cu e tin derecho pa defende su mes, y ademas cu nan ta uzando misilnan cu poco prome cu impacto ta habri di otro y presenta un monton di cluster bombs cada uno cu 2,5 kilo di explosivo... e lidernan militar ta menazando cu nan lo sigui intensifica bombardeo y tambe lo presenta cu misil-

nan nunca antes bisto.

Esaki ta sigur un reaccion riba e menaza di Donald Trump di Merca cu nan lo por ataca Iran cu forza aun nunca antes bisto, si acaso Tehran sigui tuma venganza den area di Medio Oriente, como represaya pa morto di nan lider supremo Ali Khamenei.

Forza di Defensa di Israel

a tuma nota cu hopi di e misilnan di 'clusters' aki a cay riba Tel Aviv ocasionando hopi daño material cu heridos, manera por mira riba e potret aki. Pesey nan lo sigui cu atakenan riba Iran, enfocando riba instalacionnan militar. Un explosion masivo cu a registra na Tehran, lo ta procedente di e aparato di guera di Israel.

Israel su ehercito a confirma cu nan a benta mas di 1.000 bom den apenas 24 ora di tempo di atake cu a start Diasabra mainta cu mamento di e lider supremo y varios oficial halto di Gobierno Irani.

Aparentemente planta di purifica awa na Israel no a wordo ataca



TEL AVIV: Ta un cantidad grandi di video a circula riba social media den fin di siman, indicando cu un di e atakenan di misil di Iran a explota parti di e planta di desalinacion mas grandi na mundo, esta e planta di Sorek cu ta situa na Rishon LeZion, un tiki pazuid di Tel Aviv.

Pero informacion di prensa for di Israel ta indica cu no tin ningun informacion oficial si acaso e planta a wordo afecta. Tin video ta circula

cu cayanan den area di Tel Aviv ta hopi inunda. Posibilidad ta cu un tanki di awa den e area a kibra, of tuberia grandi, pero ningun informacion cu ta e planta di SWRO cu ta produci 200 miyon cube anual di awa fresco a wordo afecta.

Un fuente a indica cu e video cu a circula riba social media ta uno bieu, ora cu awacero pisa a afecta e area di Rishon LeZion, pero no ta daño di atake di misil.

'Lidernan Irani nobo kier papia awor'



WASHINGTON: President Donald Trump di Merca a indica cu el a haya mensahe caba, cu e "lidernan nobo na Iran kier papia awor".

Segun Trump, el a acepta di papia, pues e lo bay papia cu nan. E ta haya cu nan mester a haci esaki di prome caba, cu tabata algo practico y facil pa haci, pero nan a tarda mucho pa pidi pa nan sinta papia.

INTERNACIONAL NOTICIA FOR DI VENEZUELA

MOTIN DEN WARDA DI POLIS A LAGA 19 HERIDO

MARACAIBO: Un motin cu a start den celnan di detencion na un Warda di Polis Nacional Bolivariana (PNB) na urbanizacion La Coromoto di municipio San Francisco na estado Zulia, na final a produci 19 herido, aunke e situacion a wordo controla rapidamente door di agentenan Policial.



Esnan herida durante e enfrentamentonan cu a socede Diabierna siman pasa, tabatin cortanan leve, y nan a wordo atendi pa personal medico y Paramediconan di e Warda di Polis mes. Solamente dos di e heridonan a wordo transporta pa Hospital. E motin a start debi na diferencia di opinion entre e detenidonan, y despues di esaki un grupo di 22 detenido a wordo pasa pa un otro Warda di Polis, y 27 a wordo hiba pa un Prizon na Coro, na estado Falcon. Pa awor e situacion ta bek completamente bao control, y a separa esnan cu a busca problema.

GENDARME DI ARGENTINA PORFIN A SER LIBERA

CARACAS: E gendarme di Argentina, Nahuel Gallo a wordo libera porfin for di prizon El Rodeo, unda e taba-



ta cera inhustamente pa 448 dia na Venezuela. Tabata na December 2024 cu e sub-oficial Argentino aki kier a bishita Venezuela pa topa cu su pareha María Gomez y su yiu chikito

kendenan ta biba na Caracas. El a haci esaki durante su vakantie y den forma legal. Pero el a wordo gara door di husticia Venezolano, kendenan a acus'e di ta un spion di Argentina y encarcela sin nunca wordo presenta dilanti Huez. El a wordo saca for di El Rodeo riba Diasabra anochi y riba Diadomingo el a recupera su libertad. Mientras tanto na Buenos Aires, e Asociacion di Futbol Argentino (AFA) a laga sa Diadomingo cu nan ta esnan cu a intermedia pa logra liberacion di e gendarme Nahuel Gallo. E mesun dia el a viaha y yega Argentina bek. E asociacion AFA a expresa nan gradicimento na President interino Delcy Rodriguez pa su disponibilidad pa atende e situacion aki, demostrando cu deporte tambe por ta un brug efectivo pa entendimiento. Tambe a haya yudanza di Federacion Venezolana de Futbol (FVF) cu a concreta e acercamento diplomatico y humanitario. Mientras tanto, Maria Alexandra Gomez, e casa, a bisa cu e tabatin contacto cu Nahuel prome cu el a sali rumbo pa Argentina, y ta hopi emociona cu Nahuel lo por braza su tata bek.

HOPI BLACKOUT NA ESTADO ARAGUA LUNA PASA

MARACAY: Durante luna di Februari, e cantidad di blackout a intensifica den estado Aragua, y esaki a trece



hopi incertidumbre y perdida economico den diferente sector eyan. Habitantenan di municipionan manera Libertador, Girardot, Santiago Mariño, a denuncia cu cada rato coriente a cuminsa cay, y a sigui socede mas frecuentemente y nan tabata dura hopi largo mes, afectando nan rutina di tur dia, comercio, y tambe calidad di bida. Tin caso cu negoshinan ta keda sin coriente pa 5 ora largo, y a yega di socede algun biaha cu suministro di coriente ta cay afo mas cu un biaha pa dia.

Pa chica Pos - Habri tuberia y wc.
Servicio lihe y confiabel.
Experiencia ta manda
CICLONE
Septic Tank Service
Tel: 564-0607 / 734-0607

TA FURA
ELMA UPHOLSTERY
Matras, box busca mainta y
hay e atardi! Set di sala, tv
chair, sienta auto.
Tel: 565-5577
Macapruimstraat # 1L

CONSTRUCCION
REMODELACION
Nos ta traha y drecha tur sorto
di dak: shingle, eterniet, panchi,
zink. Pega bloki, tegels, plafond,
pleister, pone porta, lanta cura,
basha vloer, construcccion di cas
y apto bon prijs. Free quotation.
Tel: 561-2137

NOS TA CUMPRO
Oro y plata kibra,
holoshi antiguos y
moderno di bon marca.
SILVER LEAF
Havenstraat 32
Tel: 746-0535 / 592-1776

TA FURA
STOEL

CEL: 561-2941

WASMACHINE
Ta drecha wasmachine,
dryer, stoof, forno.
Ta drecha, service y instala
airco. Tel: 742-2518.
Ta drecha na cas mes.

DIRECTV
A miho T.V. na Aruba
Mundial Futbol na caminda,
haya bo DIRECTV awo
prome cu ta caba.
Yama cel: 733-5762

NOS TIN SERVICIO
Corta mata y palmanan
grandi y chikito y
peligroso. Hasi tur sorto
forma di mata.
Cel: 592-1277

TA CUMPRO
Holoshi antiguo
y moderno
di bon marca.
Tel: 744-9995

SUSHI
Nos ta piki sushi tur caminda,
lage limpi limpi mane un
soño. Pa solamente 50,- pa
buelta y Ecotech apart.
Yama nos na 592-5766 of
561-5179. Arubiano trahado.

DIARIO
Pa noticia, cumpleaños,
comentario, redaccion:
noticia@diario.aw
Tel: 582-6747

Awe, 3 di Maart, ta conmemora e Dia Internacional di e Bida Silvestre

***2026 cu enfoca riba Plantanan Medicinal y Aromatico**

ORANJESTAD (AAN)-- Awe, dia 3 di Maart, ta wordo conmemora rond mundo e "Dia Internacional di e Bida Silvestre". Un tema sumamente importante, mirando cu tur persona rond mundo, ta depende di e recursonan basa riba e bida silvestre y e biodiversidad pa satisfice nos necesidadnan cuminzando pa e alimentonan, te cu combustible, medicina, vivienda, bisti, etc. Pesey, nos tur mester traha hunto pa sigura cu

e ecosistemanan ta prospera y e especienan vegetal y animal, sigui exist den futuro. E Dia Mundial di e Bida Silvestre ta un oportunidad pa celebra e forman an super bunita di e fauna y flora silvestre, concientiza tocante e necesidad urgente di lucha contra e delitonan cu ta amenaza e bida silvestre y e reduccion di especienan induci door di hende mes, locual ta crea impactonan economico, ambiental y so-

cial. E conmemoracion awe, den aña 2026, ta enfoca riba e tem a "Plantanan medicinal y aromatico: conserva e salud, e patrimonio natural y e medianan di subsistencia". Ta wordo destaca tambe e papel fundamental cu e plantanan medicinal y aromatico ta hunga den e mantenimiento di e salud humano, e medianan local di bida, y e presion creciente na cual nan ta enfrenta debi na e perdida di nan habitat, e sobre explotacion, y e cambio climatico.

DATO INTERESANTE:

- Rond di 50 mil especie silvestre di animal y plantanan ta satisfice e necesidadnan di miles di ser humano na henter mundo.
- Rond di 9% di e planta

nan utiliza na nivel mundial cu fines medicinal y aromatico, ta wordo considera den peliger di extincion, pa motibo di sobre explotacion, perdida di habitats, cambio climatico y comercio no regula of ilegal.

- Un di cada cinco persona ta depende di e plantanan silvestre, alga y hongo pa nan alimentacion y ingresonan economico.

- Den paisnan den desarrollo, 70% pa 95% di nan poblacion ta depende di medicina tradicional poa nan atencion primario di salud.

(Fuente di informacion: ONU y CITES). *CITES ta e Convencion riba e Comercio Internacional di especienan menaza di Flora y Fauna Silvestre, locual ta un acuerdo gubernamental internacional.

Remitido

Ora Hues manda un mensahe fuerte...

Sr. Redactor, permiti mi un espacio den DIARIO pa trece e comentario aki dilanti. Mi ta referi cu e asunto cu husticia ta blo ripiti cu "Mester duna castigo fuerte pa manda un mensahe eyfo"... y e lo mester conta pa Polis abusado tambe.

Na hopi ocasion Huesnan ta duna castigonan halto pa delitonan cu e argumento "pa manda un mensahe na e infractornan cu no ta tolera e delitonan cu nan ta ser acusa di dje"...

Kiermen anto cu pa evita cu cierto delito ser ripiti ta duna castigonan halto y tin biaha hopi halto pa haci un delincuente pensa dos biaha prome cu nan pensa di comete e delitonan aki.

Esaki mester por conta tambe pa polisnan cu ta abusa di nan poder y manda un mensahe eyfor. E argumento cu ta dificil pa cera un polis hunto cu otro delincuentenan ya cu Aruba ta chiquito no tin validez ya cu ta nan mes a hinca nan mes den e problema y nan mester a pensa prome cu nan a comete nan acto.

Mi tabata puntra mi mes cu si e polisnan cu a tira binti biaha riba un vehiculo lo tabata sa cu ta un familiar of un ser keri di nan lo tabata maneha e vehiculo involvi lo nan a actua manera cu nan a haci?

Un ciudadano.
(Number y adres conoci pa Redaccion).

ASSOCIATED REALTORS
CAS PA BENDE?
Bo tin pensa di vende bo cas? Anto laga nos atende cu tur e tramitenan di benta via notario. Yama Mito na 593-6318 pa un presentacion.

SEÑORA TA OFRECE
Pa drecha paña, cortina, traha furu pa stoel, sofa y ba haci tur tipo di trabao di cosemento. Mi mes ta busca y hibe bek pa bo. Tel: 660-7571.

General Contractor Gomez
Pa tur trabao den bouw. Ta busca un representante. Un truck pa chupa poz. Uitzendbureau bo ta busca trabao, bo mester hende pa traha. 297 5677513 / 5999 6918806

Oracion pa awe:

SEÑOR, yuda mi reconoce Bo den esunnan cu mi ta topa y gradici Bo pa medio di sirbishi,

AMEN.
G.C.P.A



CENTRALE
ACCOUNTANTS DIENST

Tin e tristo deber di anuncia fayecimento di:

Sra. Leoncita Donata-Danies

Wela di nos colega Vanessa Donata.

Personal di CAD ta extende palabranan di profundo pesame na Vanessa, Kaedan, Angelo y demas famia Donata-Danies y conocirnan.

Cu Leoncita sosega na paz y forsa na su famia.

SUPER CARD SUPER DEALS



**BEST CINEMA AT
THE BEST PRICES!**

**COMFORT
CLASS**

**Monday
Thursday**

8.00 AWG

**Friday
Sunday**

9.00 AWG

IMAX

10.00 AWG

11.00 AWG

VIP

11.00 AWG

12.00 AWG

Sign up today at any **The Movies** location
and **start enjoying great benefits!**

Den conexion cu Dia Internacional di Hende Muhe

SICA ta organisa un simposio y lo enfoca riba trauma y su impacto den bida



ORANJESTAD (AAN):
Diadomingo 8 di maart ta
Dia Internacional di Hende
Muhe. Un dia cu mundial-
mente ta tuma tempo pa
honra e sernan femenino pa
su historia, fortaleza, per-
severancia, sacrificio, con-
tribucion y amor grandi cu
nan ta duna no solamente na
nan famia y sernan kerí, pero
sigur tambe, na e comunidad.
Hopi organisacion, riba e dia
aki of den conexion cu e dia
aki, ta organisa actividadnan,
eventonan y charlanan entre
otro, cu temanan al caso y
importante pa conscientisa e
ser muhe riba nan importan-
cia y valor.

Den un entrevista cu DIAR-
IO, Magaly Maduro, Presi-



dente di Soroptimist Interna-
tional Club Aruba (Sica), a
conta di e simposio special di
Sica cu e aña aki ta dedica na
sanacion, consciencia y trans-
formacion. E tema general di
e simposio lo ta trauma. Tin
conversacion cu no ta facil.
Pero nan ta necesario. Si nos
no sana loke nos ta carga
paden, nos ta pasa esaki pa
e siguiente generacion. Y si
nos tin bala pa confronta,
nos por cambia e historia.

E simposio lo tuma lugá
diasabra 7 di maart 2026, di
10:00 di mainta te 2:00 di
atardi, na Space 67, Educam-
pus. E simposio lo ta total-
mente gratis den un espacio
sigur unda participantenan

por papia cu sinceridad to-
cante trauma, patronnan in-
tergeneracional y e caminda
pa sanacion.

Lo tin tres orador cu hopi
experiencia riba e tema cu lo
comparti e mensahe di con-
scientisacion den un manera
interactivo. Señora Clemen-
tia Eugene lo papia riba Trau-
ma Intergeneracional, señora
Sueli Kelly-Quant lo trata e
tema Compronde Trauma,
y señora Geraldine Lacle lo
cera e programa cu un Acti-
vacion di Siguridad Interno.
Den nomber di Sica, señora
Maduro ta invita tur hende
muhe en especial pero tur ciu-
dadano en general, na e sim-
posio diasabra 7 di maart.

THE
MOVIES at **GLORIA**
movies dining entertainment play

SETAR ta participa fayecimento di:

*Sra. Maria Magdalena
Simileer-Rojer*

Mama di nos colega Kenneth Rojer,
Supervisor Projectering Kabels.

Acto di entierro ta tuma lugá diamars
3 di maart 2026 di 1or y mey pa 3or y mey di
merdia na Pro-Cathedral San Francisco
na Oranjestad.

Gerencia, Staf y Personal di SETAR N.V.
ta extende palabra di condolencia na
Kenneth y demas famia.

SETAR

**YES, YOU CAN
AFFORD IT.**

**SHOP TODAY AND GET
2 FREE
INSTALLMENTS**

PLUS

FREE DELIVERY

FOR CREDIT CUSTOMERS!

LIMITED TIME. SHOP NOW.

**NO HIDDEN FEES | NO COLLATERAL
APPROVAL IN 24 HOURS**

